

UTL AT DOWNSVIEW



D RANGE BAY SHLF POS ITEM C  
39 10 12 04 09 010 5

BP  
165  
F4

Fehmi, Mehmed  
Hikmet-i hukuk-i Islamiye

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

5069

20/151





مداومین ملکیہ کتب خانہ سی

عدد — ۶

Fehmi, Mehmed

# حکمت حقوق اسلامیہ

Hikmet-i hukuk-i Islamiye

مؤلفی

مکتب ملکہ حکمت اسلامیہ ، مکتب حقوق مجلہ و مکتب سلطانی  
علم کلام معلمی بایزید درس عام لرندن

محمد فہمی

طابع و ناشری

اصمیر خالہ

15



استانبول

مطبعہ تنجائیک

۱۳۲۹

## ایکی سوز:

مداومین ملکیہ کتب خانہ سنک آلنجی عددینی تشکیل ایدن  
 « حکمت حقوق اسلامیہ » نك قیمت و اہمیتنی اثبات ایچون  
 مقرر ذی قدر تنك علوانانی ذکر ایلك کفایت ایدر اعتقادندیم .  
 شیمدی یہ قدر معلمین محترمہ نك تدریس و تقریر بویوردقاری  
 دروس مهمہ و مفیدہ نك کتاب شکندہ چیقار مرق رفقای محترمہ مه  
 بر سہولت تأمینہ نك مقدرت ایلکده ایدم . بو کرہ « حکمت  
 حقوق اسلامیہ » تقریرلرینی دخی طبع و تمثیل ایدہرک حیز  
 استفادہ یہ وضع ایلمکی مناسب کوردیکمدن و سائرلری کبی  
 محدود المقدان طبع ایدیلہرک یالکیز مکتب ملکیہ مداومینہ  
 حصرینی ده نجویز ایدہرکمدن ، اخوان دینیزک تأمین استفادہ لری  
 مقصد مبالغیله خارجده توزیعنی شدتله ارزو ایله مشدم . تمنیات  
 ناچیزانہ می دریغ بیورمیه جقلرندن قطعیا امیدوار بولوندیغم موجب  
 فیض و عرفانم ، مربی حس و وجدانم معلم فضائلندم فہمی افندی  
 حضر تارینہ ارزوی خالصانہ می عرض و ایضاح ایلہدم . حسن موافقت  
 بویوردیلار . ذات کمالا تپروریلرینہ قارشی مدیون و متحسین اولدیغم  
 شکران و محمدتی بو وسیلہ حسنہ ایلہده علناً بیان و یفا ایدر .  
 ووطن و ملت مزہ بر فائدہ حقیقیہ تأمین ایدہرک اولان بو اثر  
 قیمتدارک طبع و تمثیلہ عاجز بر واسطہ اولمغلہده کسب افتخار ایلہرم .  
 « ومن الله التوفيق »

احمد خالد

BP  
165  
F4

# بِسْمِ اللَّهِ الرَّحْمَنِ الرَّحِيمِ

## دین

دین ؛ ارباب عقل واذغانی طریق حقہ سوق ایچون وضع  
ایدلمش برقانون الہیدرکہ تأسیس ایلدیکی قواعد طبایع اشیایہ  
موافق ، اخبار ایلدیکی حقائق نفس الامرہ مطابقدر .

دین ؛ انسانک حیاتندہ تابع اولاجنی قواعد اخلاقیہ  
واجتماعیہی تہایم ایلہ سعادت مادیہسنی ومعادینہ عالم امور  
ووظائفی تلقین ایدہرک سعادت معنویہسنی تأمین ایدر وکالات  
بشریہ آنجق دین ایلہ تمام اولور .

ادیان موجودہ ایچندہ اتم واکمل اولان دین ، خاتمہ ادیان  
اولان دین اسلامدر .

دین اسلام ؛ (ما من مولود الا و قد یولد علی فطرة الاسلام)

حدیث شریفی مقتضاسنجه نوع بشر ایچون بر دین فطریدر .  
دین فطری دیمک ؛ انسان او دین ایلہ متدین بولونمق قابلیتندہ  
یارادیلیر دیمکدر کہ هیچ بر دین تربیہمی آلامش اولان  
بر عقل سلیم صاحبک سوق طبیعیسیلہ کندیسنی تابع



قیلاجنی شی قواعد دین اسلامدر . چونکہ احکام اسلامیه  
تمامیہ قوانین عقلیہ واحوال طبیعیہ موافقدر .

دیندہ عقل وطبعك استبعاد ایدہجکی هیچ برشی یوقدر .  
مثلا روما قانونارندہ موجود اولان ، داینہ مدیونك شخصنی  
صائمق حق کبی ، غیر طبیعی برشی موجود دکلدر . شو حالہ  
دین اسلام ، انسانرك سعادت دنیویہ و اخرویہسنی تأمین ایدن  
قواعدك مجموعی دیمکدر .

اوروپالیر « دین » دینلیمی بوندن یالکز قواعد اخلاقیہ  
آکلائیور و دینی قواعد اخلاقیہدن عبارت ظن ایدیورلر .  
بویاسہ دوغری دکلدر . چونکہ قواعد اخلاقیہ هیچ بروقت  
جمعیت مدنیہی اداره ایتك مزیتنی حائز اولاماز . زیرا اخلاق  
حقوق ووظائفدن بحث ایتمز ، یالکز آنلرہ رعایتی توصیه ایدر .  
جمعیت مدنیہی اداره ایسہ اجرایی قطعی و مجبوری برطاقم  
قوانین ایلہ اولور .

دیندن عبارت فرض اولونان اخلاق ترقیات مدنیہ واحتیاجات  
مادیہنك متوقف بولوندینی فعالیتہ خلل کترہجك قواعدہ  
استناد ایدرسہ آکا اتباع ورعایت اونامیہجنی طبعیدر . چونکہ  
ترقیات مدنیہ واحتیاجات مادیہ انساندہ قطعی التأثيردر . بوتأثیر  
ایلہ خلقدہ اوقواعدہ اتباع ایتك میلی آزالدقجہ اعتقادہ ضعف



طاری اولغه باشلار .

ایشته خرسیتانلغك آوروپاده ترقیات مدنیة نسبتندہ ضعف وانحطاطہ اوغرامہسی وبلکہ انقراضہ یوزطوتمش اولمسی بوندندر .  
زیرا خرسیتانلق انسانی عزلت وسکونہ دعوت ایدر ، ترقیات مدنیہ ایسہ فعالیت مشترکہ ومستمرہ نك آثاریدر .

دیانت مسیحیہ ، صلح ومسالت اوزره قورولمش ، قصاصی قالدیرمش ، شخصی ، جنسی ، دینی ہر نوع منازعاتی منع ایلمش ، ملکی ، سلطنتی ، دنیایی ودنیایہ عائد احتشامانی آتمشدر . مثلاً شو : « صاغ یناغنه اوران آدمہ صول یناغکی دە طوت » سوزی انجیلک وصایہسی جملہسندندر .

دیانت اسلامیدہ ایسہ غلبہ وشوکت آرامق قوانینہ مخالف کلن هیچ برشیئہ التفات ایلمہک ، هانکی قوۂ حاکمہ اولورسہ اولسون احکامی تنفیذ ایلک کبی اساسلر اوزرینہ تأسس ایلمشدر . [واعذوالہم ما استطعتم من قوۃ...] آیت جلیلہسنی تأمل ایدنلر یقیناً اکلارلرکہ بودین ایلمہ حقیقی اولارق متدین بولونانلر اقوام سائرہ نك تغلب واستیلاسنہ بویون اکمک شویلمہ دورسون بوتون دنیایہ غلبہ ایتک میانی وبومیلی تسکین ایچون طاقت بشرک مساعدا ولدینی مرتبہ چالیشمق هوسنی پرورده ایدرلر .

هر درلو حقایق آروبا تألیفاتنده آریانلردن برطاقاری  
 دین اسلامی ده خرسستیان دینی کبی اخلاق قواعدندن  
 عبارت ظن ایتدکارندن خلقك انتشار معارفله انتباهی تراید ایتدکجه  
 دین اسلامك ضعف و انحطاطه اوغرایه جفته حکم ایدر لر . بو حکمك  
 ابتدا ایتدیکی ظن فلسف اولدیغندن حکم ده باطلدر . بالعکس  
 مسلمانلر بیننده معارف ترقی و اتباع تراید ایتدکجه ایمان و اعتقار ی ده  
 کسب قوت ایده جك حکم و دقائق دینیه و معالی اسلامیه ده از یاده  
 وضوح و انکشاف پیدا ایلنه جکدر . هر و زمانه دینك منبعك  
 قورومسی شویله دورسون افکار خلق تنور و فلسفه ترقی ایتدکجه  
 او منبع ده از یاده فیضان ایده جکدر .

دین باعث سعادت دارین اولدیغی حالده نه دن مسلمانلر  
 ضعف و تنزلده ، خرسستیانلر و آروبا خلقی قوت و ترقیده در لر ؟  
 دیه ایراد اولونا جق سؤاله بوجه آتی جواب ویریلیر :

شویله که ؛ ماضیده کی تاریخ ملله واقف و حال حاضر ده کی  
 اقوام امك احوال و حرکاتنه مطلع اولانلر بیلیر لر که ارتقاء ملل  
 و یا انقراض دول بر عادت الهیه اوزرینه جاری اولالکشدیر .  
 اوده طریق ترقیه سالک اولانلر کرک مؤمن کرکسه مشرک  
 بولونسون البته ترقی ایدر لر . طریق عطالت و تدنییه ذاهب اولانلر  
 ایسه نه دینده بولونورسه بولونسونلر مسکین و ذلیل اولور لر .

شوحالده عزت و ذات دینك تأثیراتندن دكل بلكه فصالت و یا عطالتك ایجاباتسنددر . نهكیم ژاپونیایلیار برقوم وثنی بولونداقاری حالده نشرعلومه اعتنا و معارف و صنایعه اعتبار ایلداکلرنندن آز بر زمانده تعالی و ترقی ایدوب قوی الشکیمه بردولت تشکیل ایتشاردر .

مال اسلامییه ایسه رؤسا و حکمدارلرینك استبدادلرینه سرفرو ایدوب عطالت اوزره قلمشار و مقتضای دینیلری اولان سعی و اجتهادی ترك ایتلری حسیله کندیلاری ذات و مسکنته و دولت و حکومتاری ده ضعف و انحطاطه دوچار اولاکلشاردر . حال بوکه امت اسلامییه بدایتنده بر حزب قایل اولهرق نشأت ایتمش، مهماتی مفقود ، سلاح و لوازمی محدود بولونمش ایکن خارق-العاده ابراز ایلداکلری اقوام و همتلری سایه سنده شان و شوکت ، رفعت و شرفك الیوکسك طبقه لرینی اشغال ایله مشاردر . سبیل ترقیسنه سد چکمك ایستیان اقدامی دویرمش ، پك چوق فتوحات و فیوضاته مظهر اوله کلشدر . بوکون ایسه عددلری یوزلره میایونه بالغ اولداقاری حالده عطالت و جهالتاری و حکمدارلرینك استبداد و ظلمی سیئه سیله مملکتلری یغمایدیلیور، ماملکلری اللرنندن آلنیور . وقتیه زیر حمایه لرنده بولنان اقوام بوکون انلره تغلب ایدیور ، بوکون امتك نه سوزی مسموع



نده امری مطاع اولیورکه: [ ان الله لا یغیّر ] بقوم حتی یغیروا  
 ما بانفسهم [ آیت کریمه سنک حکم منینی تظاھر ایدیور .  
 بوآیت کریمه ده جناب حق بر قومک نائل اولدینی رفاه ونعمتدن  
 دور اوله رق محن وشدائدہ دوچار اولمیرینه انجق کندیلری  
 سببیت ویردیکنی بیان صددنده بیوریورکه [ بر قوم نفسارنده کی  
 حالی تغیر ایتدکجه الله او قومک حالی تغیر ایتمز : ] یعنی بر  
 قوم متصف بولندقاری اعمال صالحه یی ، متحلی اولدقاری فضائل  
 اخلاقیه یی ترک وتبذیل ایتدکجه جناب حق او قومک نعمت  
 وعافیتنی ورفاه وآسایشنی تبذیل وتغیر ایتمز . خلاصه بر قوم  
 دوچار مذلت ونکبت اولورسه بوحاله انجق کندیلری باعث  
 ومستحق اولمش اولورلر . کتاب کریمک دیکر بر سورده سنده  
 شو نص جلیل وارد اولشد: [ وضرب الله مثلا قریةً

كانت آمنةً مطمئةً یأتیها رزقها رغدا من كل مكان  
 فكفرت بانم الله فاذا اقها الله لباس الجوع والخوف بما  
 كانوا يصنعون ] مأل منینی ؛ [ جناب حق بر قریه وبربلده یی  
 مثل قیلدی ، دیکر لرینه عبرت ایلدی که اوبلده آسوده ومطمئن  
 اولوب رزقی هر طرفدن بول بول کلیرکن اهلینسی اللهک

﴿﴾ دین و اعتقاد خصوصاً افکار بشر ﴿﴾

نعمتارینه کفران ایلدکلرندن یعنی سیئه تهالک کو ستردکلرندن  
حق تعالیٰ حضرتاری ده بو ایتدکلری سببیه آنلری جوع و  
هراسه دوچار ایلدی ] .

تاریخک شهادتیه ثابتدرکه فساد اخلاقه مبتلی اولان اقوامک  
قوت و سلطنتاری زائل و هیئت مجتمعه لری محو و مضمحل  
اولمشر. شان و شوکت بر قومک صحیفه موجودیتندن ملی ایدلمسی  
انبج فضائل اخلاقیه رعایت ایدلمه مسندن نشأت ایدر . فضائل  
اخلاقیه هر نوع سعادت و اقبالک قوه موجوده سیدر . انکله  
رفاء و اسایش تجلی ایدر ، انکله وفاق و اتحاد ظهور ایلر .  
فساد اخلاق ایسه ؛ دها ایلک هجومده افراد جمعیت بیننده کی  
رابطه حب و موالاتی فک ایده جکندن مبتلارینی کندی  
سلاحاریله اعدام ایلر . ادوار سالفه ده شعشه شوکت و اقباللری  
جهانی دوتمش اولان او غظمتلی اقوام شمدی زرده ؛ آنلر  
مبتلای انواع سیئات اولدکلرندن قعر نایاب مهالکده محو اولوب  
کیتدیلر . اخلاق بوزو قلغندن اعتقاد بوزو قلغنی حصوله کلیر ،  
فساد اعتقاد ایسه موجب فلاکت دارین اولور ...

دین و اعتقاد خصوصاً افکار بشر

عمومک معلوم و مسلمی اولدینی وجهله بتون اقوامک بر

اعتقاد و عبادت مخصوصہ می وارد ر . بونک عکسفی یعنی عبادات و اعتقاداتی کلیاً رد ایدنار بوکون افراد بشر آرمسندہ بولنہ بیاورسہدہ ہر حالہ عددلری پک آز بر مقداری تشکیل ایار . انجق معتقد اولانلرکدہ بوبادہ افکاری یکدیگرینہ مخالف اولارق اکثریتہ خلق امر اعتقادہ اوچ قسمہ آیرلشاردر :

برنجی قسم ہر ایشک خالق و صانعی جناب واجب الوجود اولدینی و روحک موجودیت و بقاسنہ مبنی کشی اعمال و افعالنندن مسئؤل اولوب دار آخرتہ جزا و یاخود مکافات کورہ جکنی اعتقاد ایار و اوصورتلہ ایمان ایدہرک نائل سعادت عظمی اولور کہ بونلر زمرہ موحدیندر .

ایکنجی قسم ہ خالق کائناتی و روح انسانی بی و امور اخرویہ بی انکار ایلہ بشرک یا لکز جسمدن عبارت بر حیوان اولدیقنہ و وفاتیلہ ترکیبات بدنہ سی محو و منحل اولہرق بالکلیہ فنا بولدیقنہ قانع اولورلر و ضلالت و غفلتاری سببیلہ دنیا و آخرت مہالکنہ معروض قالیرلر . بونلردہ فرقہ منکرین در کہ اقناع اولناری غیر قابل و طریق حقہ سوق ایدلملری پک مشکلدیر .

اوچنجی قسم ہ مترددین کروہیدر . بونلر کائناتی جناب حقی یرائدی ، یوقسہ کندی کندینہ طبیعت واسطہ سیلہ می وجودہ کلدی ؟ روح انسانی فی الحقیقہ موجود میدر ، یوقسہ



انسانان کورینان بو فیض و ذکاء قوه دماغیه سندی عبارتدر ؟  
صانع عالم ، روح ، آخرت ، جزا و مکافات واریدر ، یوقمه  
انسان بعدالوفات محو و منقلب اولوب کلیاً فانی می‌اولور ؟ دیسور  
و هیچ بر جهتی تصدیق و یا تکذیب ایدمه‌یه‌رک متردد قالیورلر.  
بوناری ارشاد ایچون دنیلیرکه ای مترددین انبیا و مرسلین و  
پیشوای اهل یقین اولان زمره جلیله‌نک بوباده‌کی بیانات حقائق  
غایتندن عرب . یونان ، روما و باجمله اوروپا فیلسوفلرینک سزک  
متردد و یاننکر بولندیکنر خصوصاً ثبات و قبول ایلمکده  
اوللارندن قطع نظر اول امرده کورمکده اولدیغمز شو موجوداته  
برکره عطف نظر ایدم : ابتدا شمس و منتظم اولان سیر  
و حرکتنه باقلم . کونش بر جسم غیر مدرك ایکن دائماً اوقات  
معینه‌ده مواقع معلومه کورینیور و بوانتظامنه اصلاً خلل کلیور ،  
صکره کیجه حوال ایدنجه عددلری مایوناره بالغ اولان برده  
کواکبه نظر ایدم . یالکن کره ارضدن کورینان بی حساب  
نجومک هربری کمال انتظام ایله وظیفه‌لرینی اجرا و یکدیگرلرینه  
اصلاً حائل و مانع اولمق سزین حرکتلرینی اودرجه منتظم بر صورتده  
اینا ایدیورلرکه مثلاً یوز االی سنه صکره بر کوکب فضانک  
هانکی نقطه سنده بولنه‌جی کشف اوننه بیایور . بونلر ایسه  
جماداتدن اولدقاری و عقل و ادراکدن محروم برر جسم بولندقاری

حاله بوحركت منظمه يه نرهدن مالك اولديار؟ بوجهت شبهه كتورر بر  
 كيفيت دكل ايكن حس وروحدن آزاده بر طاقم اجرام سماويه بلا محرك  
 حركت و انتظام لرني نصل بوله بيلديار؟ تصادفاً وقوعه كلدي دنيليرسه  
 بوني عقل ووجدان قبول ايلز. منكرين بيله بر مدتدنبري تصادف  
 كله سني تركله بوناري طبيعى اولان قوانين عموميه يه « قوه جاذبه  
 ودافعه » اسناد ايتمكده درلر. آنجق قوانين عموميه تعبيريده  
 تصادف كي لفظ بي معنا قبيانندن اولور. كرچه اجرامده قوانين  
 عموميه واردر. فقط بوكال حكمتله وضع اولمش اويله بر  
 قوانين دركه بر حاكم مطلق و بر صانع اعظمك وجودينه هر شيدن  
 زياده شهادت ايدر. قوانين عموميه نك مرتبي كيمدر؟ هر جسمده  
 اقتضا ايدن ذرات و قوتى و اجسامك موقع لرني و بعد و مسافه لرني  
 و درجه سرعت لرني كيم وضع ايلشدر؟ طبيعتى ديه جگزر ؛  
 طبيعت بر كره نهدر ، عنقا كي بر حيوان موهوم ميدر ، يوقسه  
 قوه جاذبه ودافعه ، حرارت و برودت ، دمير ، كمور كي موادك  
 متفرقا و يا من حيث المجموع اسمي ميدر؟ اويله ايسه بونارك كافه سنك  
 بي عقل و تدبير اولدقاريني و هيچ بر وقت قوانين عموميه دكل  
 خصوصيه بيله وضع ايدهميه جگزريني منكرين دخي تصديق  
 و اعتراف ايدرلر .

طبيعت : موجوداتك و موجوداتده كوريان حالاتك عادى

براسمی اولوب عاقل و فاعل اولمق اوزره هیچ بر قوتی حائر دکلدیر . ارباب فن آردسنده طبیعت ( Nature ) اوچ معناده استعمال اولمقده در . بری کافه اجسامک من حیث المجموع اسمی اولمیدر ، دیکری هر جسمک ابتدادن جریان ایدن احوالیدر ، اوچنجی معناسی ده صانع عالمک اجرام و اجسامه بخش ایلدیکی انتظام دیمکدر . ایشته حقیقت طبیعت شو معانی مذکورده دن عبارت ایکن نصل طبیعت مکون عالم اولور ، انسان کی بر مخلوق اکلی ، افلاک کی بر منظومه احسنی نصل وجوده کتیرر ؟

پایجه هیچ کورمدیکی شاهیندن ، قوزی یه هیچ بیلمدیکی قورددن حس خوفی ویرن عجبا طبیعتمیدر ؟ خیر صانع کل جناب خالق لمیزلدر . فن موالید ایله اشتغال ایدن منکرین دخی اعتراف ایدرلرکه اولدن ذی روح بر تخم اولما یخه کره ارضده هیچ بر ذی روحک وجوده کلسی ممکن دکلدیر . بو اعتراف اوزرینه اقتضا ایدرکه تخمی ده خلق ایچون بر صانع مطلقک وجودینی اقرار ایلسونلر . خیر اقرار ایتزلر و دیرلرکه فی الحقیقه کره ارضده اساساً بر تخم اولماسیدی ذی روح مخلوقده وجوده کلزدی . اما احتمالکه وقتیه اجرام سماویهدن ارضه بر طاقم تخمار دوشمشده حیوانات اوصورتله وجوده کلشدر . بو عقلایه اولیه ایسه اجرام سماوییه تخم نره دن کلدی ؟ دنیلسه عجبا نه جواب ویررلر ؟



بجائز که بر فلسفه دخی فی‌الذیل ! فقط بو حالریله فرق نمینده  
 بیان بیوریلان [ ان شر الدواب عند الله الصم البکم الذین  
 لا یعلمون ] وصفنه تماماً کذب استحقاق ایدرلر .

### دینک فوائد مدنیهسی

انسانلرک سعادت مادیه و معنویهسی تأمین ایدن دین عقول  
 بشره باشلیجه اوچ عقیده تلقین و دیگر اوچ خصصه‌لده تزیین  
 ایدرکه بوناردن هر بری موجودیت مایه و مدنیت محیثه‌نک  
 اساسی وهیئت اجتماعیه‌نک بادی ارتباط و ارتقاسیدر .

عقائد ثلاثه‌دن برنجیسی ؛ انسانک اشرف مخلوقات اولدینه  
 اینانمه‌سیدر . ایکنجیسی ؛ هر دین صاحبی کندی ملتک اشرف  
 امم اولدینه ، مخالفلرینک طریق ضلالته سالک بولندقلرینه نفع  
 اولمسیدر . اوچنجیسی ؛ انسانک بو عالمندها عالی دها واسح  
 دیگر برعالمه عروج وانتقالی خصوصنده لازم کلن فضائل و کالاتی  
 تهیه واحضار ایچون بوعالم حیاته کلدیکنه قائل اولمسیدر .

بوعقائدک فوائدینه کلنجه ؛ برنجی عقیده انسانک اشرف  
 مخلوقات اولدینه اینانمسی ، صفات حیوانیه‌دن اجتناب و افعال  
 بهیمیه‌دن نفرت ایتمسی استازام ایدر . و بو سایه‌ده روحی ،

انسانیتی ترقی ، کمالات عقلیہ و فضائل نفسیہ می نکامل ایلار .  
 وافرادی آردسندہ اخوت و معاشرت ، روابط و مسالمت ،  
 حقانیت و عدالت تقرر ایدرکه سعادت انسانیه نك من جهت الد  
 نیویہ غایہ سیدہ بودر . بو عقیدہ درکه بشرک فیکرینی اصلاح ،  
 عقلنی تربیه ، اخلاقنی تزکیه ایله انسانلرک یکدیگرینی بلیع و اغتراسه  
 باعث اولان بغض و منافرتارینی منع وازاله ایلار . ایکنجی عقیدہ  
 بر قومک منسوب بولندیغی امتک اشرف امم اولدیغی اعتقادی  
 افرادینی اوصاف فضله و مفاخر ملیهده امم سائرہ ایله شرف  
 و تعالی مسابقلرینه دعوت و عقلی ، روحی ، معاش و معادی  
 هر درلو مزایای اجتماعیه اقسامندہ دیگر اقوامه تقدم ایتک ایچون  
 اتحاد و اتفاقه ترغیب ایلار . بو عقیدہ اربابی بشقه اقوامده کوردکاری  
 معالی و مفاخری هر کونا سعادتق کندی ملتارنده کورمک  
 ایستلر . بو عقیدہ علوم و فنونک و صنایع و بدایعک توسع و انتشارینه  
 اک بیوک برعامل و مؤثر ، اک نفوذلی بر آمر مجر در . بو اعتقاددن  
 محروم بولنان اقوامک ایسه اطوار و افعالنده فتور ، همم  
 و مساعیسنده قصور اوله جنی ، قوتلرینک ضعفه . عزتارینک ذلتہ  
 تبدل ایده چکی شبهه سزدر . اوچنجی عقیدہ : بو عالم فانیه  
 کسب فضائل و کمالات ایدرک دها عالی بر عالمه انتقال ایچون  
 کلدیکی ، حیات ابدی و سعادت سرمدییه آنجق او عالمده نائل

اولہیلہ جکی اعتقادی صاحبک ماسکات عقایہ سنی اکالہ وانک آثار حسنہ سنی ابرازہ سہی ایدر۔ بو عقیدہ صاحبی کذب و خیانت بغض و عداوت ، غصب و سرقت کبی فنا لقلارہ قطعاً جرأت ایدہ مز۔ و وظائف مودوعہ سنی اصلاً ترک و اہمال ایلیہ مز۔ چونکہ بردار الجزانک وجودینی اعتراف یتکدہ در۔

### خصائل ثلاثہ

خصائل ثلاثہ دن برنجیسی حیادر۔ حیا، جالب لوم و توبیخ شیلری ارتکابدن نفسک انفعال و تأثری دیمکدر۔

حیا ، شرف نفسی استلزام ایدر۔ شرف نفس ایسہ بالعموم معاملاتک مداری و سلسلہ انتظامک محوریدر۔ عہود و عقودی حمایہ ایدن و انسانک اقوال و افعالندہ ثبات و متانتی ضامن اولان اودر۔ بناءً عایہ بو خصالتک تأثری یوزلرجه قوانین ، بیکلرلہ قوای ضابطہ دن دہا زیادہ در۔ چونکہ نفس شیربر کرہ حجاب و حیائی بیرتہرق فضاحت و دنائت و رطہ سنہ دوشر و اجرای مفسدہ باشلار سہ آنی ہانکی جزا منع ایدہ بیلور ، و ہانکی قوت آنی طریق حقہ سوق ایلیہ بیلور ؟ انسانلر ارہ سندنہ کی الفت و معاشرت کبی روابط ہپ ملکہ حیایہ منتهی اولور۔ چونکہ روابط الفت حفظ حقوق و معرفت حدود ایلیہ تأیید ایدی لور کہ



بوده او خصات كريمه نك وجودينه وابسته در. معلمارك ، مربيارك  
آلت تأديبي ده بوخصلتدر. مكارم اخلاقه دعوت، فضائل صوريه  
ومعنويه نك نشر وتعميمنه خدمت ايدنلرده اني استعمال ايدرلر  
شوحالده صفت حيا بتون محاسنك اساسي وبالجمله فضائلك مبناسي  
اولش اولور .

ايكنجيسي امانتدر. معاومدر كه نوع انسانك بقاسي معاملات  
ومبادلاتله قائمدر. بونلك روحي ايسه امانتدر. انسانلر اره سنده  
بوصفت فاسد اولور سه نظام تمدن وبوسيله حيات بشرفنايه منجر اولور.  
چونكه امانتك فقدانى امن واستراحتك انسانى وحقوق  
عبادك ضياعنى قتل ، غصب كى فنا لك تعمم وانتشارينى استلزام  
ايدر. طرق تجارت قبانور فقر واحتياج قپولرى آچياور ، خزينه  
بوشانور ، حكومت منقرض ، دولت ومات مضحيل اولور  
شوحالده بشرك بقاسي ، حكومتلك اس الاساسي امن واستراحتك  
انتشارى. شوكت ومكتك باعث اعتلاسى امانت خصلت عايه سي  
اوله جنى اكلا شيلور .

اوچنجيسى صدقدر . انسانك محتاج اوله جنى شيار پك  
چوقدر. الك عادى بر حاجتى ايفايه ، الك خفيف بر مضرتى ازاله يه تك  
باشنه مقتدر دكلدر. بنى نوعندن استمداد واستعانه يه قطعياً محتاجدر  
تدوير امور وتدير معيشت خصوصنده شخص آخرك مستحضرات  
عقليه وملكات فكر يه سنه هر حالده عرض احتياج ايار وانندن

## ﴿حکمت حقوق اسلامیه﴾

مستفید اولور. دیمک اولور که نوع بشرک قوهٔ معنویه سی استفاده در. استفاده ایسه استخبار طریقیه ممکن اوله بیاور. بر خبرک مفید اوله بیلمسی ایسه صدقه مقارنیتله مشروطدر نفس الامر موافق اولمیان بر خبر مفید دکل مضردر.

صدق : بین البشر باعث الفت واخوتدر. صدقمن نه بر خانه خالق آره سنده تأسیس الفت نه در مملکت اهالیسی بیننده بسط اخوت قابل اوله بیاور .

## شونلر کویا دین اسلامک برر قصوری ایمش ...

(۱) تعدد زوجات (۲) طلاق (۳) اسازتدر که بونلر عائله حیاتی تسمیم ، جمعیتک انتظامی تشویش ایدر. (۴) حریت مذهبیی اخلاصدر چونکه دین اسلامده مذهبه مساعدیه یوقدر دین اسلامی هرکیم انکار ایدر سه انک جزاسی سیف قاطعدر (۵) نصرانیتک انتشارینه ممانعتدر. زیرا قرآن ، سیف محمدی انجیلک تأثیراته دائما مانعه تشکیل ایتمه کده در (۶) تستر نسوان در که قادینلر ایچون موجب اسارت وذلدر (۷) قضا و قدر در که معتقدلر نی عطالت وکسالته سوق ایدر (۸) توکل در . بونک ده غایه سی اعمال و مسامحه و تعطیل امور در . (۹) جهاددر . بونک نتیجه سی ده قتل عباد و تخریب بلاددن عبارتدر .

ایشته عالم نصرانیتک اسلامیه قارشو اعتراضلری شوکی

مواددن عبارت اولغله بونلرك هر برينه ايروايرو جواب ويرمك  
 وادله مقنعه سيلهر د وابطال ايتك اوزر ديرزكه :

## تعدد زوجات

دين اسلامده تعدد زوجه جائزدر . فقط بو اور و پالياردن  
 بعضيلرينك ظن ايتديكي كبي هر كس ايچون لازم اولميو ب  
 بلكه تعدد زوجه كنديلرينه جائز اولانلر عادتاً محدود و قليلدر .  
 زوجاتك جائز اولديغني بيان بيوران آيت جايلهده تعدد بو پك  
 عياندر . استعيز بالله [ وان خفتم ان لا تقسطوا في اليتامى  
 فانكحوا ما طاب لكم من النساء مثنى وثلاث ورباع  
 فان خفتم ان لا تعدلوا فواحدة ] يعنى يتيم قادينلري تزوجكز  
 تقديرنده عدالتى محافظله ايدميه جككز دن قورقارسه كز اي  
 كورديككز قادينلردن ايكي ، اوچ ، درت قادينيه قدر تزوج  
 ايديكز . اكر زوجات عديده مياننده تماماً اجراي عدالت ايدميه  
 جككز دن قورقارسه كز بر زوجايله اكتفا ايديكز . ديمكدر .  
 بر حديث شريفدهده ( اذا كان عند الرجل امرأتان فلم يعدل بينهما  
 جاء يوم القيمة وشقه ساقط ) بيورلمشدر كه بر انسانك ايكي

زوجہ سی اولوب بینارنده عدالت ایتمزسه یوم قیامتده اوکیمسه  
برجهتی دوشوک اوله رق کلیر مال منیفنده در .

تعدد زوجاتک حکمت عقلیه سنه کلنجه: معلوم اولدیغی وجهه  
ازدواجده ایکی بیوک مقصد وارد؛ بری تناسل، دیکری محافظه  
عفت وصحتدر. تناسل ازدواج ایله حاصلدر. حالوکه برچوق  
ازدواجار اولورکه انلرده بوغایه حصوله کلز. بناءً علیه تعدد  
زوجات مشروع اولمسیدی برچوق کیمسه لک نسللری منقطع  
اولمق لازم کلیردی. انقطاع نسل ایسه خصوصی وعمومی بیوک  
برضرردر. بدولتک ترقی و تعالیسنه ال بیوک مدارتک کثر نفوسدر.  
تعدد زوجاتک کثرت نفوسه نه درجه لرده خدمت ایده چکی ایسه  
مستغنی بیاندر.

محافظه عفت وصحت بحثنه کلنجه ؛ تعدد زوجہ یه قولاً  
معترض بولسانلرک فعلاً برقادین ایله اکتفا ایتمه لاری تعدد  
زوجہ یه میلک برامرجیل اولدیغنی کوستر مکده در. شوخالده بومیل  
نامشروع برصورتده اجرا ایدیله جک اولورسه برطاقم علت  
ساریه وامراض مهالکه نک زیر حکمنده بزبون اولنه جنی شبهه سزدر.  
اوروپالیر نامشروع محللاری رسمی برشکله قویه رق و تدلی  
معاینه طبیه یه تابع طوته رق تحدید مضراته چالشمقده ایسه لرده  
بوکی تدابیر هیچ بروقت تعدد زوجاتی تجویز کی برتدبیر  
شرعی یه بکزه مدیکندن برطرفدن سرایت امراضی آزالتیرکی



کور نورکن دیگر طرفدن تزايد ایتمکده اولدیغنی ینیه کندیلری بیان وشکایت ایتمکده درلر.

وارد خاطر اولورکه متعدد زوجهلر آرسنده امتزاج وحسن معاشرت حاصل اولیه جنی کبی اوزرینه اوله نیامش اولان قادینده اضطراب و کوکل عذابندن خالی دکدر . شو حالده تعدد زوجات فصل معقول ومستحقین اوله بیلور ؟ بو خاطریه جواباً دینلورکه ؛ زوجهلر بیننده عادلانه حرکت ایشک امتزاجدنزلق جهتی بر طرف ایده جکی کبی کندیسنگ اوزرینه اولنمندن طولای مضطرب بولنان قادینده زوجنگ سبب تأهلی چو چوغی اولماسی ویا کندیسنگ مرض دائمی یه مبتلا بولنمی کبی بر لزوم مشروع اوزرینه اولورسه اضطرابنگ تحفف ایده جکی شبهه سزدر .

ایشته شوبیانندن اکلایشلورکه اسلامیتک تعدد زوجاتی مشروع قیلمسی بر چوق حکم ومنافعه مستند اولوب خصمارینگ ادعا ایتدیکی کبی اوله حظوظات نفسانیه یی استیفا وآمال هوا پرستانه یی اجرا ایچون تأسیس ایدلمش دکدر .

باقک افکار فلسفه وحقیقت پرورانه می خصمای دین زنده بیله بر حجت کبی تلقی اولنان وولتر بوبابده نه دیسور : «ای جاهلر ؛ ای احمقار ! دیگر بر طاقم جاهلر دین اسلامک شهوت آمیز وهوا پرست بر دین اولدیغنه سزی ایمان دیریسورلر . حقیقت حال ایسه بویه

دکادر۔ پاکِ حقوق مسائلدہ سزى اغفال ایتدکاری کبی بومسئله دده  
الداتیورلر ای راهبار ، منزویار ، پاپاسار شهر رمضان ایام  
صیفه تصادف ایتدیکی وقتار سزى امساك زمانندن  
غروب شمسه قدر ییوب ایچمکدن منع ایتسهلر ، قار و خردن  
نهی ایاسهلر ، بلاد حارده کائن قطعہ حجازیه بی زیارته ،  
سنوی مالککړ قرقدہ برینی تصدقه سزى مجبور قیلسهلر ، اون  
سکز قادیناه معاشرته الیشمش ایکن بردن بره درده ایندیرسهلر  
طوغری سویله یکنز بویه بر مذهبه هوا پرست نامی ویریله بلورمی؟»

## طلاق

هدف اعتراض اولان طلاقده شریعت مزجه اصل اولان  
حرمت و ممنوعیتدر . یعنی غیر شرعی یه مبتنی بولنمان طلاق  
ممنوعدر. نته کیم [ فان اطعنکم فلا تبغوا علیهن سیهلا ]  
آتی و ( انقض الحلال الی الله تعالی الطلاق ) حدیثی  
کبی نصوص شرعیه بو ممنوعیته صراحه دلالت ایتدکدهدر.  
انجق زوجین بیننده تباین اخلاق وقوعیابه بغض و عداوت  
علی الخصوص زوجده موجب تهمت و نفرت احوالک ظهوری  
کبی اسباب مجبره و ضرورییه بناءً شریعت طلاق مشروع  
قیلمشدر . واقعا زوج ایله زوجہ آراءسنده اسباب موجبیه

مبنی بر کره شیرازہ انتظام زوجیت مختل اولدیمی اراق طلاقدن  
 بشقه انکچون چاره خلاص یوقدر. بوکا بناء درکه بوکون ملل  
 متمدنه دن بر چوقلری دخی طلاقک محسناتنه قائل اولهرق  
 انی قبول ایتشار وشو حکم شرعی به معنا اتباع ایشاردرد. شو  
 قدر وارکه انار حق تطایق شریعتده اولدینی وجهله زوجیه  
 ویرمیه رک محکمه به تودیع ایدیورلرسده شریعتک بو مسئلهده  
 حکمت وبرهانی پک واضح اولهرق مشاعده ایدیلمور. چونکه  
 امر طلاقک محکمه به تودیع اولنمی ایکی وجهله باطلدر.  
 بریسی، زوجک نفسنه اولان ولایتی ولایت خاصه، حاکمک انک  
 اوزرینه اولان ولایتی ولایت عامه در. ولایت خاصه ایسه  
 ولایت عامه دن اقوی ایکن بوراده ضعیف ایله حکم ایدلمکده در.  
 دیکری؛ اسباب طلاق بیان اولندینی وجهله زوجین بیننده  
 یا تباین اخلاق ویا زوجنه نک موجب تهمت بر حالد بولنمیدر.  
 تباین اخلاق صورتده حاکم نیایه حق یکدیگری نی سومین زوج  
 ایله زوجیه ی زور ایله می سودیره جک. بن حکم ایتدم یکدیگری کزی  
 سویکز قوری قوجه اولهرق دوریکز می دیه جک؛ موجب تهمت  
 احوالده ایسه زوج بوخصوصه وجداناً قانع اولدینی حالد  
 محکمه به قارشو اثباتندن عاجز بولنورسه نه یاهحق؛ وجداننه  
 مخالف اولهرق قادینک برائتنه می قائل اولهحق وحقند تهمت  
 دعواسنده بولندینی بر قادین ایله بعد ازیں نصل امرار حیات

ایلیہ جک؟ حالہو کہ امر طلاق زوجک یدندہ اولوبده زوج اسباب  
تہمتی کیمسہیہ افشا ایتکمزین زوجہ سنی تطایق ایدرسہ بو  
تطایق انک ایچون بر عبرت مؤثرہ اولہ جفندن اصلاح نفسا  
بر دیگر ی ایلہ عقد ازدواج ایدر واندنصکرہ حیاتی عفینانہ و  
مسعودانہ امرار ایار . کرچہ شریعتمزده زوجک زندیق ویا  
غین اولمی کی اسبابدنطولای زوجہ نک محکمہیہ حق مراجعتی  
واسباب افتراقک تحقی ایلہ حاکم آره لرنی تفریق ایلمی  
وارسده انجق بو حق تطایق علی الاطلاق محکمہیہ عائد وراجع  
دکدر . بلکہ زوجہ نک حاکم مراجعتی محضا مدعاسنک ثبوت  
واظہاری اساسنہ مبتنیدر .

## اسارت

دیانت جاییہ اسلامیه حقنہ عالم نصرانیاتک اعتراض ایتکده  
اولدقاری مسائلدن بری اولان اسارت اساساً دین اسلامده  
ممنوعدر . چونکہ حریت بشریہ شریعت اسلامیه نک قواعد  
اصلیه سندندر . اسارت یالکز حرب زمانلرنده مشروع اولمشدر .  
بوندن مقصد دشمنک عددینی تقلیل و طولایسییہ حربی منع  
وتعطیلدر [ سز اثنای حرب وقتالده اسیر الیدیگیز حالده آنلری  
قاچیرمیه حق صورده محافظه ایدیگیز . اندنصکرہ یالطف واحسان  
ایدوب مجاناً آزاد ویاخود کندی اسراکزله مبادلہ ویا رفدیہ



معلومہ اخذیہ سیدلرینی تخلیہ ایدرسکوز [ مانندہ اولان  
[ حتی اذا انخنمورهم فشدوا الوثاق فاماننا بعد واما فداء ]

آیت کریمہ سی اسیرلرک ختام حربہ قدر قتل واثلاف ایدلیوب  
حسن محافظہ ایدلسی وبعدا الحرب بلا بدل اطلاق و آزادی خود  
فدیہ اخذی صورتیہ صالورلسی لازم کله جکی بیان بیورمقده در .  
اسارت مقتضای دیا تدر دینلر بو حقایق دینیہ واقف اولمدقاری  
کبی ( محاربہ ایتمد کجه اسیر اتخانی هیچ بر پیغمبر ایچون جائز  
دکلدر ) معناسنده اولان [ ما کان لنی ان یکون له اسری

حتى یخن فی الارض ] آیت شریفہ سنہ دخی مطلع اولمہ مشاردر .  
برده غربایلر دین اسلامده کی اسارتی کندی ملک تارنده کی اسارتہ  
قیاس ایدرک بو بابده پک ایلرویه کیدیورلر حالوکه ایکی ملکیت  
آرہ سندہ کی اسارت بالکلیہ بشقہ شیلدر . قبل الاسلام اسرای  
حرب اولدیریور ، قلیچدن کچیریور دی اسلامیت بونی قلدر دی .  
فدیہ ایله ویا مجاناً سیدلرینی تخلیہ ایددی . فدیہ ویرہ مینلری  
اسیر اوله رق ابقا ایلدی . فقط هانکی عائله ایچنده بولنور سه  
افرادندن اولوق شرطیہ ابقا ایلدی . او یله آمریقا و مستملکاتده  
اولدینی کبی انسانلری اسیر نامیلہ حیوان سوریمی نوزہ سنہ  
تنزیل ایتمک ممالک اسلامیه ده هیچ بر وقت کورلش شیلردن  
دکلدر . مدنیتاریہ تمدح ایدن اوروبالیرک شو عصر اخیرده

یابد قارینه باقیاورسه اسرای خربه نهر اجرا ایتیمورلر. طوبارک  
آغزینه قویوب کله یرینه حی آتیمورلر بزنجورلره باغلیه رق قورشونابه  
بینلری حی طاغتمیورلر؟.. دین اسلام ایسه اسارتی صورتده ابقا  
ایتدیهسه بو مثللو فنالقلرک اوکنی آلمق ایچون ابقا ایتشدر .

### حریت مذهبییه

غریبلر دین اسلامک حریت مذهبییه اخلال ایتکده  
اولسندن بختله دینمزه برده بو صورتله اعتراضده بولنورلر که  
بو ایسه دین اسلامه افترا و بهتاندن بشقه برشی دکلدیر .  
چونکه قرآن کریم [ لا اکراه فی الدین ] و [ افانت تکره  
الناس حتی یکنوا مؤمنین ] و [ قل للذین اوتوا الکتاب  
والامبین ااسلمتم فان اسلموا فقد اهتدوا وان تولوا فاما  
علیک البلاغ والله بصیر بالعباد ] آیات کریمه لریله حریت  
مذهبییه نیک اساسنی وضع و تأسیس ایش و امر دینده اکراه  
واجبار اوله میه جننی ایلک اوله رق دین اسلام میدانده قویمشدیر .  
بشقه دلیلنه حاجت .. اکر دین اسلامده حریت مذهبییه اولمسیدی  
اون اوچ عصر دنبری اهل اسلام آرمسندده بوقدر ملل مختلفه  
نصل پایدار اولوردی . و موجودیت مایه و مذهبییه لری نی نصل

محافظہ ایدرلردی . کتب فقہیہ نک هر هانکی برینه مراجعت ایدلسه هیچ بر قومک هیچ بر وجهله دین ومذهبلرینه تعرض جائز اولمدینی کورلمش اولورینه او کتب فقہیہ ده اذا وجفانک حرمتی بختنده مصرح مسائلدنرکه غیر مسلماردن برینه کافر دینلسه قائلنه شرعاً جزا وتغزیر لازم کلور . فقهای مشهوره دن ابن حزم دیورکه تبعه غیر مسلمه دن بر فرقه اوزرینه کندی دینداشلری اولان دشمناری هجوم وتسلط ایاسه بزم انلرک دشمنلریله محاربه ایتمه مزوایجابی حالنده فدای جان ایله مز ایجاب ایدر . مسلمانلر دینلری ایجاباتندن اوله رق هر یرده وهر دورده حریت مذہبیہ رعایت ایتمشلدرد .

خلفاء عباسیه زمانلرنده هر هانکی بر دین ومذهب اربابندن اون خانه خلقی بر محبده برلشیرلرسه کندیلرینه مخصوص بر معبد انشاسنه صلاحیت ویرلمشیدیکه مساعدنک بودرجه سی هیچ بر دین وهیچ بر مملکتده کورلمش شیلردن دکلدرد . شو وقعه آتیده اهل اسلامک حریت مذہبیہ ومساوات بشریه بقدر رعایتکار اولدقلرینی واضحاً اثبات ایتمکده در . شویله که : بر کره حضرت علی برای محاکمه بریهودی ایله جناب عمرک حضورینه داخل اولور . حضرت عمر یا ابالحسن سن ده خصمکله برابر آیاقده دورمالیسک دیمسی اوزرینه حضرت علیده بر اثر انفعال کوریلور . بعدالحاجه که سببندن سؤال اولندقدده دیرکه سبز بکا کنیه مله خطاب

ایتدیکز . بوندن خصم قیریلہ حق وعدالت ومساوات محافظہ  
ایدلیہ جک فکرینہ دوشہ جک دیہ قور قدمہ متأثر اولدم جوابی ویرر .  
ایشته حقیقت مسئلہ ووقوعات ده بوندن عبارت ایکن خلافتی  
ادعا ایتک یعنی دین اسلامده حریت مذہبیہ یوقدر دیمک دینمزه  
قارشو بہتان وافترادن ویاخود جہالت وتعصبدن بشقہ بر شینہ  
حمل اولئمہ ماز .

## دین اسلامک انتشار نصرانیتہ ممانعتی

نصرانیتک دین اسلام حقندہ کی اعتراضلرندن بریسیده  
بوایدی . اعتراف ایدرزکہ نصرانیتک بو ادعاسی پک طوغریدر .  
چونکہ دین اسلام، دکل خرسیتیانلغک بلکہ بالجلہ ادیانک انتشار-  
ینہ بر مانع عظیمدر . زیرا بر قوم ایچون حقیقت اسلامیہ  
وصولدن صکرہ انی ترک ایتک وبشقہ بر دین ایلہ متدین اولمق  
متصور دکلددر . بوبر قصور ایسہ بوقصوری کمال افتخارلہ قبول  
ایدر وبونی دینمزه ایچون بر شرف عدایلرزه شو حالده دین اسلامک  
انتشار نصرانیتہ مانع اولمسی اسبابی شو دین عالینک قدسیتمده  
آرایوب جبر وتضییقندہ ویاخود قلیجندہ آراماق لازم کلیر .  
دین اسلامک ادیان سائرہ یہ ممانعتی قلیچ سایہ سندہ اولمدینی کبی  
کندینک انتشاریده بو صورتلہ دکلددر . تاریخہ وقوفی اولانلر  
تسلیم ایدر لرکہ حضرت پیغمبر نشر دینہ یاشلادقده کندیلری



وحید و فرید بولنوب قوت و شوکت صاحبی دکل ایدیلر. کندی قوم و قبیلہ سی بیلہ بو خصوصده ابراز خصومت و عداوت ایتمکده و انواع اذا وجفا ایله کندیلرینی دلگیر ایلمکده ایدیلر فقط رسالت مآب افندمنز مأمور اولدقلری وظیفه تبلیغه بروجهله خلل کتیرمیه رک صبر و ثبات کوستر لر و خلقی جناب حق و حدایتنه دعوت بیوره رق محاسن اسلامیه یی اظهار بیور لر دی. بو سایه ده حقیقت دینه تبیین ایتمکده خلقده فوج فوج دینه اتباع ایلمکده باشلادی که بواثناده نه قلیچ استعمال ایلمکده نه ده بر قطره قان دو کولمکده ایدی. شو حالده هانکی بروجدان صاحبی دین احمدی قلیچ سایه سنده تقرر ایتمش و احکام اسلامیه یی ناس جبر و اکراه ایله قبول ایش ادعاسنده بولنه بیلور؟ اسلامیت قلیچ سایه سنده انتشار ایتشدر دینلره صورارز. چین قطعہ سی هیچ بر دولت اسلامیه طرفدن فتح اولندی؟ اولنمدی ایسه چینده بولنان اللی ملیونی متجاوز اهل اسلام نه واسطه ایله قبول دیانت ایدیلر. سیف اسلام ایسه هیچ بروقت چینه کیرمه مشدر. زیرا چینه اسلامیت یالکمز تجارتله کیدن عربلرک مواعظ حسنه سیله کیرمشدر. بودورلر ده (یدنخی قرن میلادی) بر خیلی نستوری پاپاسلریده خرسیتیانلغی نشر ایچون چینه صوقولمشلر دی. عجبا خرسیتیانلق اسلامیت قدر نه ایچون خارقه انتشار کوستره مدی؟.. اقصای شرق جزائر مجتمعه سنه ده باقم.. بو اطه لرده ده ملیونلرله نفوس اسلامیه موجوددر.

عجبا بورالره هانکی سیف اسلام کیرمشده جبر و شدت ابراز  
ایلمشدر... ذاتاً امر وجدانیدن عبارت بولنان دین هیچ بروقتده  
هیچ بریره جبر و تضییق و سیف و سنان ایله کیرمش دکلدرد .  
نصل که نصرانیتده بتپرست اولان روما و یونان اقوامی ایچنه  
النده قلیچ اولمدینی حالدده کیرمشدر . چونکه توحیده مستند  
اولان نصرانیت او اقوامک تعبداً بتدکلری ادیان باطله یه مرجع ایدی .  
مؤخرأ نصرانیتک الله قلیچ کجمش ایسه ده توحیددن  
ثلثه عدول ایدلمش یعنی دین وضع اصایسندن چیقارلمش  
اولدیغندن قلیچک هیچ بر فائده سی کورولمه مشدر . انکیزیسیون  
مظالمی، اهل صلیب و قایبی، قتلکیر ایله پروتستانلر آره سنده کی  
دین غوغالری و بونلرک نتایجی معلوم عالمدر . آ کلاشیلیور که  
اسلامیتک سبب انتشاری وادیان سائرته نک شیوع و تعممنه  
ممانعتی قلیچ ایله دکل بلکه احکامنک عین حقیقت و محض حکمت  
بولنمی و مقابلنده کی معتقداتک اباطیل و خرافات قیلاندن اوله رق  
اکا قارشو قویه حق اقتداری حائز بولنمه می سایه سننده در .

### تستر

شعائر جلیله اسلامیه و عادات مستحسنه دینه دن بری  
اولان تستر نسوان کیفیتیه ده ( قادینار ایچون موجب اسارت .

## تستر نيك

وذلت ديه ) غربايلار طرفندن دوچار اعتراض اولمقده در .  
 حالبوكه تستر باعث شرف و عزت اولوب توكشف ايسه بالعكس  
 انلر ايچون بادي حقايرت و ذلالتدر . چونكه تستر ايتمين قادينك  
 اركلار طرفندن دوچار تعرض اولمسي احتمالي واردر . بو ايسه  
 برقادين ايچون الك بيوك بر حقايرتدر . اديان سماويه و باخلاصه  
 شريعت اسلاميه قادينلري بوكي تباوزاتدن مصون بولنديرمق  
 ايچون تستري امر ، و توكشفي نهى ايلشددر . تكريم انجيمده  
 ( بر قادين كه باشي آچيق بر حالي طاعاته بولنور و راي بيان  
 ايدرسه باشنه ناموس سزاق دعوت ايتمش اولور ) ديور و مستوري تي  
 امر و تنبيه ايلنور قرآن كريمك [ قل لاوزواجك و بناتك  
 و نساء المؤمنين يدين عليهن من جلابدين ذلك ادني ان  
 يعرفن فلا يؤذين ] آيحه عين مقصد ايله متظاهر بولنيور .  
 معنای منيفي [ ياني الله زوجات و بناتكه و سائر نساء مسلمينه  
 سوايه كه آنار طيشاريه چيقد قارنده يوزلرني و باشلرني اورتسونلر  
 يعنى قاعده تستره رعايت ايلسونلر . بو آنارك دوچار تعرض و اذا  
 اولماياريچون بك ايددر ] ديمكدر . [ قل للمؤمنين يغضوا من  
 ابصارهم ويحفظوا فروجهم ذلك ازكي لهم ان الله خير بما  
 يصنعون ] و [ قل للمؤمنات يغضضن من ابصارهن ويحفظن

فروجهن ولا یبدین زینتهن الا ماظهر منها ولیضربن بخمرهن  
 علی جیوبهن ولا یبدین زینتهن الا لبعولتهن او آبائهن .... ]  
 آیات کریمه لریده بوباده شرفنازل اولان بینات عالیهدندر. مال  
 شریفلری [ یارسول الله مؤمناره سویله که کوزلرینی نامحرمله  
 نظردن منع وعورت محالرینی حفظ وستر ایلسونلر که بو منع  
 وستر انلرک حقنده بک نافعدر. وجناب حق انلرک افعال وانظلا  
 رینه واقف وخیردر. قادینلرده سویله که انلرده بومنع وستره  
 رعایت ایلسونلر. وزینتارینی ضروری اولان اقسام مستثنا  
 اولقی اوزره ذکر وتعداد ایکیلن محرمارندن بشقه سینه کوستره  
 مسونلر ] دیمکدر آیت ثانیهدده خاصه مؤمناته خطابدن منفهم  
 اولور که رجالک نسیاه نظرلری نصل حرام ایسه نسانکده رجاله  
 نظرلری او یله جه حرامدر. چونکه سبب حرمت اولان فتنه  
 هرایکی صورتدهده حاصلدر.

اصحاب کرامدن ابن ام مکتومک حضور نبوتیناهی یه دخولنده  
 رسالتماآب افتدمن نزد سنیهلرنده بولنان ازواج مطهراته تستر  
 ایتارینی امر و فرمان بیوردقارنده انلر یارسول الله او اعمی  
 دکلیدر. نه ایچون تستر ایدم؛ دیمارینه جواباً حضرت پیغمبر او  
 اعمی ایسه سز دکلسکز. او سزی کور میورسه سز آنی  
 کور میورسکز. بیورمشارددر.

تسترايکي نوعدر. بري خانه دروننده کي احتجابدر که قاديئلرک خانه داخلنده زوجنک و محارمنک غيري يه کورونمه مسيدر. ديکري خانه خار- جنده کي احتجابدر که کيمسه يه کورونمه مک اوزره يوزيني وياشدن اياغه قدر بتون اندامي وحتي داخل لباسني ستر و اخفا ايلکدر. طار اورتو و چارشفاه اجانبه قارشو عرض اندام ايتکده ممنوعدر. يوزليني والريني وحتي اياقلايني نمازده آچيق بوانديره بياورلر سده فقط ضرورت اولدقجه بونلري دخي نامحرمه کوستره مزلر. (يوز نامحرم دکلدري) تعبيري نماز حقنده اولوب نمازک غيريده غلظدر.

تسترك حکمتي اشارت ايدايکي وجهله قاديئلري ارککلرک تعرضندن مصون و تعدي و تجاوزلرندن امين بولندي ر مقايچوندر. چونکه قاديئلرک فضيلت و عفتارينه قارشو دائما هجوم و تسلط ايلکده اولان ارککلرک صولتنی دفع ايدجک قدر صلابت فطايهسي اولميان نسوانک آلت مدافعهسي انجق تستر ايتمي او اهبياور. جين پاک عصمتارينی لکه دار ايتک ايستين رجاله قارشو سلاح مقاومتاري انجق دوش عصمتارينه الدقلري ردا لري او اهبياور.

مستوريت ادعا اولنديني کي قاديئلر ايچون موجب اسارت دکل بلکه، مستلزم استقلال و حریتدر. چونکه تستر ايتيويده بتون محاسن و تجملاتيله کنديني انظار اجانبه وضع و تشهير ايدن



برقادیّن طبعیعدرکه استقلال وحریتنی ووقار و عزّتی محافظه  
ایده منّ، دوچار تعرض اولور. حالبوکه قادیّن لطیف بر مخلوقدر.  
تجاوز و تعرضدن وقایه وحمایه سی لازمدرکه اسباب حمایه دن  
بری ده تستدر.

معارضار دیورلرکه تسترقادیّنلرک حریت طبعیه لینه و تربیه لینی  
اکمال ایلمرینه ووقت ضرورتده نفقه لینی قازانملرینه مانعدر.  
جوابآدیرزکه تستر قادیّنلرک حریتنی سلب ایتمزبلکه بالاده ذکر  
ایدلدیکی وجهله اناری حریت حقیقه ایله وایه دار ایدر. و تربیه لینی  
اکماله قدرت ویرر. و اعمال خارجیه ده ارک کلرله اشتراک بلیه سندن  
حفظ ایلر.

دیورلرکه تسترک اوچ مضرتی واردر. ( ۱ ) نسانک  
مختارینی خالدار ایدر، عصبی راحتسزلکلره معروض قیلار.  
( ۲ ) اولنه جک اولان آدمک اله جنی قادینی کوره مه مسنی ایجاب  
ایدر. بوایه امتزاجسزلفک و بناء علیه طلاقک وقوعنه سبب  
اولور. ( ۳ ) قادیّنلرک تعلم و تهذیب اخلاق ایتمرینه مانع اولور.  
بز بو ادعاری رد وابطال ایچوند ده دیرزکه: قاعده تستره  
رعایت ایدن قادیّنلر عصبی راحتسزلقلره دوچار دکل بالکس  
آچیق کزن قادیّنلردن ده صاعلام، ده قوتلیدرلرکه بو حال  
هرکسک مشهود و مسلمیدر. تستر، نسائی عصبی خسته لقلره  
معروض قیلیددی اون اوچ عصردن بری مستور اوله رقیاشایان

مسلمان قادينارينك مختل بولمى توارث طريقه بتون  
مسلمانلارك ضعيف وزبون و خسته لقل اولمى لازم كليردى .  
ضعف اعصابى ايسه اصل غرب نسوانده كورمكده يز . زيرا  
ضعف اعصابك باشليجه دليلى اتخار اولوب نسوان اسلاميه  
آرهنده همان يوق دنيله جك درجه ده اولدني حالد اوروپا  
نسوانى آرهنده كثير الوقوعدر . فرانسه ده رسمى ايستاتستيقار-  
دن النان معلوماته نظراً ۱۸۸۹ دن ۱۸۹۳ سنه سنه قدر كذران  
اولان درت سنه ظرفنده ۵۸۶۹ قادين اتخار ايتمىدر . بوندن  
اكلاشيلوركه شرق قادينارينك اعصابى غربك كيلردن دعا  
قوتليدر .

تسترك ار ككك الهجنى قادينى كورمسنه مانعنى وبو  
سببىدن طلاقك وقوعنه سببىت ويرمى ملاحظه سنه ده ديرزكه ؛  
اولا طلاق مسلمانلارك طبقات عاليه و متوسطه سنده همان يوق  
كيدر . اكر دنيلديكى كى طلاقك سببى ار ككك الهجنى قادينى  
كورمه مسندن ناشى اولسيدي بونك شو ايكي قسم خلقدده طبقه  
سفلاى عوامده نه قدر ايسه او قدر اولماسى ايجاب ايدردى .  
حالبوكه مشاهد بونك عكسنى كوسترمكده در . ده ار ككك تزوج  
ايدجى قادينك اخلاقى قبل الازدواج كوروب اكلامسى عدم  
طلاقى كافل اولسيدي غربده طلاقك بوقدر چوق اولماسى  
لازم كليردى . چونكه اونلرده تستر اولمديغيچون بو مقصد

استندلیکی کی استحصال ایدیه بیلیر . حالبوکه بوکون اورالده  
 طلاق کترتی عقلای غربی دوشونده جک برمرتبه بی بولمشر .  
 تستر قادیلاری تهذیب اخلاق وتعلمدن منع ایدرسوزی ایسه  
 هیچده طوغری دکدر . چونکه بزقیزک سن رشده مکته  
 بولنسی انک تربیه وتهذینه پک اعلا کفایت ایدر .

علی الخصوص بتون معلملری قادین اولق اوزره قیزلره  
 مخصوص مکاتب عالییه وجوده کتیرمکده غیرت دینه احسانه  
 کوره بیوک برایش دکدر . اوزمان قیزلر ایستندلیکی کی تعلیم  
 وتربیه ایدیه بیلیرلر .

شو سرد اولنان مطالعاتدن معلوم اولورکه مستوریت  
 نه صحتی اخلال ایدر ، نه اعصابی ضعفه دوشورر نه ده  
 هوسات نفسانییهی اویندیرر . بالعکس مفسد ورزائله  
 قارشو اوپله مادی برمانع تشکیل ایدرکه اگر بوکا برده معنوی  
 مانع علاوه ایدیلورسه اوزمان صرف مادی اولان شو مدیتک  
 و خودنده خونین جریحهلر شکلنی المش اولان فلاکتلرک ،  
 مصیبتلرک پک چوغی بشریتک اوستندن صیرلش اولور .

## قضا وقدر

قضا وقدر ؛ لغته فصل وحکم معنایه اولوب اصطلاحده

جناب حقك شئونات عالمده جاری بولنان حکم کلیسی دیمکدر .  
 بعضیلر قدر: مقدرات ازلیه‌دن، قضا: او مقدرات ازلیه‌نک وقت  
 وزمانده ایجاد و انفاذ ایدلمسندن عبارتدر دیرلر . شو حالده قضا  
 و قدر جناب حقك علمنه ، علمی ده معلومنه تبعیتله یعنی هرشی  
 فصل اوله جقمه اولوجهله جناب اللهك بيلمسیله احوال و اشیانی  
 تقدیر و ایجاد بیورمسندن عبارت اولور . علمك معلومه تابع  
 بولنمی دلالت ایدرکه شو صفات جلیله‌دن جبر لازم کلر .

اشته‌دیانت اسلامی‌ده قضا و قدر بوندن عبارت اولدینی حالده  
 غریبلردن برچوقلری بونی مسلمانلر حقنده بر سبب طعن و تزییف  
 اتخاذ ایدرک بر طاقم تفوهات و توهامده بولنشاردر .

دیرلرکه بو وجهله قضا و قدره ایمان هرهانکی بر قومك وجدانده  
 یرطوتارسه آرتلق او قومده عزت و قوتدن اثر قالماز . وانلرک یرینه  
 ضعف و مسکنت قائم اولور . بوکا بناء درکه مسلمانلر بو عقیده‌لری  
 سببیه فقر و ضرورت و ذلت و فلاکت ایچنده قالمشاردر .

غریبلرک اعتقادنجه قضا و قدره ایمان ایله انسانك بتون  
 افعالی اضطراری اولدیغنه قائل اولان مذهب جبری آرهمسند  
 هیچ بفرق یوقدر . اوله توهم ایدیورلر که مسلمانلر قضا  
 و قدره اعتقادلری ایجابجه کندیلرینی هواده معلق توی پارچه‌سی‌کی  
 کوریورلر ، قضا و قدر روزکاری اوکنده بی اختیار  
 بولنیورلر .

ایمدی هانکی بر قوم بو اعتقاده بولنورسه بتون قواسی  
معطل ، حواسی مختل اوله جغندن وبالنتیجه محو وانقراضه محکوم  
بولنه جغندن ارتق مسلمانار کده بو اعتقاد لری سببیه عاقبت لری زهیه  
منبجر اوله جنی معلوم اولمش اولور .

حاصلی غریبوندن بر قسمی مسلمانلر حقنده شویله بر ظن  
باطل بسلاک لری کبی بزدن بر طاقم فکر سزلرده آنارک بو سوز -  
لرینی نفس الامر مطابق اولمق اوزره تلقی ایدیورلر . طوغریبی  
اللهه ومسلمانلره افترا ده بولنیورلر . چونکه بوکون سنی، شیعی،  
زیدی، وعابی، خارجی هیج بر مسلم یوقدر که غریبونک دیدیکی کبی  
جبر محضه قائل اولسونده کندندن اختیار وارادهی کلیاً سلب  
وازاله ایلسون . بلکه شو طوائف مسلمهدن هر بری اعمال  
وحرکاتنده کندیلرینک اراده جزئییه مالک اولدقارینی وبو اراده  
کندیاری ایچون مدار ثواب وعقاب اوله جغنی بیلیرلر . وبو اراده  
سایه سنده نائل فوز و فلاح اوله جقارینی اعتقاد ایدرلر . کرچه  
بروقت لر جبرییه نامیه مسلمانلر آره سنده بر فرقه تورهمش، انسانلر  
افعالنده مجبور و مضطر در، یوروین بر آدمک یورومسیله دوشن بر  
آدمک دوشمسی بیننده فرق یوقدر دیمشار سده مسلمانلر بوناری  
شدتله رد ایتشار وبو سوز لری سفسطیه حل ایلشاردر . ذاتاً  
بو مذهب باطل اربابی ده تادردنجی قرن هجریده نام ونشانلری  
محو اولمشیدی .



قضا و قدره اعتقاد شائسته جبریه دن تجرید ایدیلیرسه  
 انسانی شجاعت و بسالت ، صبر و متانت ، جود و سخا ،  
 صدق و وفا کی بر طاقم اوصاف کریده ایله متصف قیلار .  
 و شان انسانیته شین ویره جک حالاتدن بری طوتار . عمرک  
 محدود، رزقک امین و مقسوم اولدیغنه و بتون اشیانک دست  
 مشیت خداده بولندیغنه اعتقاد ایدن بر آدم هیچ بر شیدن  
 قورقماز، حتی مدافعه، فریضه ذمتی ادا و محافظهده هیچ بر شیدن  
 چکنمز . بوکا بناء درکه جناب حق بو اعتقاد اعجابی [الذین قال لهم  
 الناس ان الناس قد جمعوا لكم فاخشوهم فزادهم ايمانا وقالوا  
 حسبنا الله ونعم الوكيل] آیت کریمه سیله مدح و ثنا بیوریور .

واقع الحال جمعیت بشریه نك بدايت تشككندن شمدی یه قدر  
 هیچ ربیوك فاتح، هیچ معروف بر سردار کورلمه مشدرکه علوه متی  
 سایه سنده مراتب رفیعیه نائل اولسون ، توسیع ممالك ایلسون ،  
 شدائی آسان کور سونده اساساً قضا و قدره معتقد اولسون . انسان  
 فطرتی مقتضاسی اوله رق حیاتنه پک حریصدر ، موجودیتنه  
 پک بخیدر . اکر قضا و قدره اعتقادی اولمز، مقدراتک حصوله  
 کله جکفی، ظاهرده کی قورقولرک هیچ بر تأثیری اوله میه جغفی بیلمزسه  
 اوشدائی اقتحام ایتدیره جک نه اوله یلور ؟

تاریخاً معلوم و مضبوط بولنان بر طاقم اکابرک سلسلهء موفقیتاری،

فتوحات عظیمه به نائیتاری هپ قضا و قدره اعتقادلری سایه‌سندہ در . اسکندر کبیر ، جنکیزخان هپ بوعقیده اوزرینه صاحب رسوخ ایدیلر . ناپولیونک قدره پک‌زیاده اعتقادی اولدینی مشهوردر . ذاتاً اونى نسبةً آزعسکرله بیوک بیوک اردولر اوزرینه هجوم ایدرک احراز ظفره سوق ایدن هپ بوعقیده‌سی ایدی . شوخالده قضا و قدره ایمان برماک انحطاط و تنزلی دکل بلکه اعتلا و ترقیسنی مستلزم اولور .

مسلمانلرده کی تأخرو تدینک منشأی‌ظن اولندیغی کی نه‌عقیده قدردر، نه‌ده سائر عقائد اسلامیه‌در . مسلمانلر نشأ‌تاریخی متعاقب نشوؤ غرور و ظفرله سرمست اولدیلر . بو‌حالده ایکن ایکی مدھش صدمه‌یه معروض قالدیلر که بری شرقدن جنکیز خان ایلہ احفادک هجومی، دیکری غربدن اوروپالیلرک بتون مملکتلرینی استیلاسی ایدی . بو‌حال قابولامته دهشت بخش اولوب بوسبیلہ متانت و شہامتلی، نجسدت و عاوه‌متملی زائل اولدی ، صکره برچوق حکومتاره آیرلدیلر؛ نااهل برطاقم امرایه منقاد اولدیلر . نتیجهً شواحواله معروض قالدیلر . فقط امت اسلامیه عقائد صحیحہ‌لری سایه‌سندہ برکون البتہ سیلکنوب قالقه‌حق، مبتلا بولندیغی بومرضدن قورتیلہ‌رق اکتساب عافیت ایده‌جک و شانلی ماضیسنی اعاده ایلہ‌جکدر .

## توکل

دین اسلام علیہنہ بدخواہان طرفندن حوالہ اولئسان سهام  
اعتراضدن بریده توکل در .

آنارہ کورہ اسلامیت توکلی امرایلدیکنندن طولانی انسانلری  
عطالت و کسالتہ و کور کورینہ حرکت ایتکہ سوق ای دیورمش،  
فکرہ دور غونلق ، قانہ او یوشقاق ویرہ رک تعطیل امورہ بادی  
اولیورمش .

بوواهی سوزلر هیچده طوغری دکلدرد. چونکہ ؛ مسلمانلر  
توکلی : اسباب ظاہریہ رعایتلہ برابر جناب حقہ اعتماد ایلمکدن  
ووسائل ووسائطہ تشبہا برابر اللہ تفویض امور ایتمکدن عبارت  
بیلرلر .

شوحالدہ مسلمانلر نذرندہ توکل، تعطیل امور دکلدرد. بلکہ انسان  
ایشلیدیکی ایشده جناب حقہ نصرت و معاونتی تمنی ایتکہ و امداد  
الہیہ اعتماداً امور مشکله یی اقتحام ایلمکدر. (یا نبی اللہ امکله استشارہ  
ایت بعد الاستشارہ عزم و قصد ایتدی کک شیئاری انفاذ ایله، اللہ،  
متوکل اول، اللہ ذات الوہیتہ توکل ایدناری سور) مألندہ اولان  
[ وشاورهم فی الامر فاذا عزمت فتوکل علی اللہ ان اللہ  
یحب المتوکلین ] آیت کریمہ سی اهل اسلامک توکلده کی اساس

اعتقاد لرغی بیلدیرر . و حقیقت توکلک نه دن عبارت اولمی لازم  
کله جکئی کوسترر . بو آیتک تفسیرنده فخرالدین رازی سویله  
سویله یور : « بو آیت جلیله دلالت ایدرکه توکل ؛ بعض جهله نك  
دیدکلری کبی اهمال نفس دکلدر . والامشاوره ایله امر ، توکل  
ایله امره منافی اولوردی . توکل : اسباب ظاهره یه مراعات ایتمک  
و فقط قلبا آکا کوونموب جناب حقک حفظ وصیانتنه اعتماد  
ایلمکدر . »

شونلرده مسلمانلقده کی توکلک حقیقتنی کشف وایضاح  
ایذر ادله و بیاناتدندر :

برکون رسالتآب افندمزك نزدینه شتر سوار براعرایی  
ککشیدی . دوه سنی براقوب حضوره کیردکده : (دوه کی نه یاپدک؟)  
بیوردیلر . اعرابی : ربمه توکل ایده رک صالیویردم . دینجه :  
( قالدق دوه کی باغلا ، صکره ربکه توکل ایت ) بیورلدی .

حضرت عمر اهل یمندن برجماعتی کوردکده آنلره : « ای  
اهل یمن ! سز نه سکز ؟ » دیدی . آنلر دیدیلرکه : بز متوکل  
علی اللهیز . جناب فاروق بیوردیکه « یالان سویله دیکز سز متوکل  
دکل متاکل سکز ، اکله کروهندن سکز . باق سز مه متوکللی خبر  
ویرهیم : متوکل اول کیمسه درکه یره تخم صاچارده اللهیه توکل  
ایذر ، لطف حقه اعتماد ایلر . »

ایی دوشنولورسه تسلیم ایدیلرکه : عالمده بونجه آفات

وعوارضه قارشو توکلدن ، لطف باری به التجادن کیم مستغنی  
اوله بیلور ؛ نیجه کره لر اسباب مادیه بالوجوه مکمل اولدیغی  
حالده موفقیت کورولدیکی اولور وحقک اراده سی یرینی بولمقده  
اولدیغی مشاهده ایدیلور . عادة اللهم جریانی اوزره اسباب  
مادیه کرچه علت کونیه ایسه ده آنک تکمله سی ینه لطف  
خدادر ، مادیات اسباب عادیه در ، عوامل مؤثره دکلدیر .

توکل ؛ فکره دورغونلق ، قانه اویوشوقلق ویرمز ، عطالت  
وکسالت بادی اولماز ، بالعکس فکره ، روحه زنده لک ویرر ،  
معتقدلرینی [ قل لن یصینا الا ما کتب الله لنا هو مولانا  
وعلى الله فلیتوکل المؤمنون ] دستور جلیلی ایله تشجیع ایلر  
وحاست ومانتله بین الایم ممتاز قیلار .

## جهاد

دیانت جلیله اسلامییه بین البشر صلحی تأسیس ایتک اوزره  
ظهور ایلش ؛ عبادات ، معاملات ، اعتقاداته دائر اولان کافه  
احکامی نظام عالم و حیات امی محافظه مقصدینه مبتنی بولنش  
ایکن حربه جواز ویرمسی مقصد تأسیسنه منافی کی کورینورسه ده  
دیانت اسلامییه نک حربی تجویز ایتسی مجرد مهاجمات اعدایی  
مدافعه واسباب تحفظیه بی التزامه مبنی اولدیغی وقایع ماضیه



و بوباده کی آیات قرآنیه ایله ثابتدر . [ ادع الی سبیل ربك  
 بالحكمة والموعظة الحسنة ] نظم جلیلی دین مبینہ دعوت  
 رفیق وملایمت واسلوب حکمت ایله اولمسنی وسفک دمایه میدان  
 ویرلمه مسنی ناطق بولنمقده و بدایت اسلامدهده بو صورتله حرکت  
 اولنمقده ایکن مشرکین قریش صاحب شریعت افندمزہ واصحابنه  
 انواع اذا وجفا ایله ابراز عداوت ایدرک حیثاتلرینه دخی سوء فصد  
 ایتمش اولملریله مجرد حربہ بادی اولماق اوزره ترك دار و دیار  
 ومدینہ منورہ یی کندیلرینه دارالقرار اتخاذا بیورمشلردر .  
 حالبوکه مشرکین مکہ بورادهده کندیلرینی راحت برقامش  
 ومدینہ منورہ یی تعرض وهجومدن کیرو قالمش اولدقلری کی  
 کعبہ مکرمہ یی زیارت ایچون آردهده وقوعبولان وحیدیه مصالحه سی  
 نامیلہ یاد ایدیلان معاهده یی دخی نقض ایله حربہ قیام ایللری اوزرینه  
 [ وقاتلوا فی سبیل الله الذین یقاتلونکم ولا تعتدوا ان الله  
 لا یحب المعتدین ] آیت کریمہ سی نازل اولمشدرکه حربک جوازی  
 محقنده ایلک نازل اولان نظم جلیلدر . اشبو آتی تعقیب ایدن  
 [ ولا تقاتلوهم عند المساء جد الحرام حتی یقاتلوکم فیہ فان  
 قاتلوکم فاقتلوهم ] نص مبینی دخی مقاتله نک انجق مقابله و  
 مدافعه صورتیلہ وقوعنه جواز ویرلدیکنی ناطقدر . مقاتله دن

مقصد مقابلہ اولہرق موجب فتنہ واختلاف اولان اسبابك منع وازالہسنی [وقالوہم حتی لا تكون فتنة] نظم منینی و بو بابدہ محاربات ومقاتلاتدہ مقابلہ و مماثلہ یہ رعایتك لزومنی [ فمن اعتدى عليكم فاعتدوا عليه بمثل ما اعتدى عليكم ] نصی کریمی فرمان بیورمقدہ در .

شو آیات کریمہ کافۃ حقوق حرب وصلاحی جامع برر دستور اولدینی پك واضح و آشکاردر . چونکہ حربیدہ مقابلہ بالمثل مشروع اولنجہ اشبو مماثلہ اسباب حرب ایلہ حربیدہ استعمال اولنہحق اسلحہدہ مجروحین واسرایہ ایدیلہجك معاملہدہ جاری اولہجفی وانجق خصم حدود مشروعہنی تجاوز ایدرك ظلم وعداوتدہ بولندینی حالہ اكا متابعت جائز اولہمیہجفی [ ان الله لا يحب المعتدين ] آیتلہ مصرح بولنمقدہ در .

رسول اکرم افندمن اسباب موجیہ ومجبریہ ببناء قبائل اوزرینہ ۴۷ دفعہ سریہ ارسال بیورمش و ۲۷ غزادہ بالذات کندیلاری بولنش اولدقلاری حالہ یالکز ۹ دفعہ طرفین بینندہ حرب ظہور ایدرك دیکرلری مصالحہ ایلہ نتیجہ نمشد . شو ۹ محاربہك اسبابی تحری ایدیلورسہ کوریلورکہ سبب حرب یا کندیلاریلہ معاهد بولنان قبائلک نقض عہد وخیانت ایتلری ویاخود اعدانك هجوم وتسلط ایتلری اولمشدر .

## ممنوعات حربیه

حرب ؛ اساساً دشمنی مالاً ، بدناً اضرار ایلک و هردرلو معاملاتنه قارشو مقابله بلئلده بولمق ایجابات حربیه دن اولدییی حالده دیانت اسلامیه بوبابده بر طاقم موادی استثنای ایدرک انلری ممنوع قیلمش و اثنای حربده دخی اجرای عدالتی توصیه ایلشدر . انلرده صبیان و پیران ، نسوان و رهبان ، علیل و اعمی و اسیرانک قتللری و مجروحینک اتلاقی ، میوه دار اغاچلرک و مزروعاتک قطع و احراقی ، حیواناتک ذبحی و ارتکاب معاصی کبی شیردرکه بونلرک هربری متعدد آیات و احادیث ایله نهی و تحریم بیورلشدر . بوندن آکلاشیلیورکه شریعت اسلامیه هر خصوصده عدالتی امر و التزام ایلکده و بین العباد ظلم و فساد ایقاعندن نهی و تحذیر ایتکده در .

اوروپا متعصبانلرندن بضایرینک شمعدییه قدر و وقوع بولان محارباتده عساکر اسلامیه یه اسناد ایلدکلری تعدیاتی تکذیب ایچون بو حقایقی ذکردن بشقه آیروجه بر دلیل ایرادینه لزوم قالمیه جفی بدیهیدر .

## صلح

محاربه موجب سفک دماء بر آفت عظاما اولدیغندن منعی

ایچون هرشیء یاپیلمه لی وهر کونافدار کارلق اختیار اولئمه لیدر .  
 و صلح قبل اولدقجه حرب جهتی التزام ایدلمه مایدر .  
 [ یا ایها الذین آمنوا ادخلوا فی السلم كافة ] آیت کریمه سنده کی  
 فرمان الیهدن [ وان طائفتان من المؤمنین ... ] ایله باشلایان  
 شو ایکی آیت جلیله ده کی [ اصلحوا ] امرینک اوج کره ذکر  
 وتکرار بیورلمسندن صاحبک — کرک بین الاشخاص و کرک  
 بین الاقوام — فرض عین اولدینی استدلال اولنور . مصالح  
 عالم رسول اکرم افندمزده هر معامله لرنده صلحی التزام  
 بیورمشار و ( الصلح سید الاحکام ) حدیث شریفاریله بو  
 خصوصی بیان و تقریر ایشلردر .

خی ضمره قبیله سیله عقد بیوردقاری مصالحه ده کی صلحنامه .  
 لرینک صورت شریفه سی تیمناً و تبرکاً اشبو محله قید ایدیور .  
 ( بسم الله الرحمن الرحيم هذا کتاب من محمد رسول الله  
 لینی ضمره بانهم آمنون علی اموالهم وانفسهم وان لهم النصر  
 علی من عاداهم ان لا یحاربوا فی دین الله وان النبی اذا دعاهم  
 لنصره اجابوه علیهم بذلك ذمة الله وذمة رسول الله ولهم -

النصر علی من بر منهم و اتقی . ) مال منیفی اشبو مصالحو نامہ رسول اللہ اولان محمدن بنی ضمہریہ و یریلوب حکم و عہدی اولدرکہ بنی ضمہریہ اسلام ایله محارب اولماق و پیغمبر کنڈیارینی یاردمہ دعوت ایتدیکی حالده احابت ایلک اوزره مال و جانلرینی تأمین ایدر . و متقی و خیر خواہلرینه یاردم ایدہ جکئی جناب حق ایله پیغمبری نامنه تعهد ایدر دیمکدر . اشبو معاهدہ جلیله مضمونندن غیر مسلم اولان امم واقوا ایله تجاوز می و تدافعی عقد معاهدہیہ اسلامک مأذون بولندقلری مستفاد اولدینی کبی مصالحہ صورتیله جسم اختلاف ممکن ایکن طریق حرب و ضربہ ساوک جائز اولدینی نمایان اولور .

اسباب صلحدن بری ده [ واعداء لهم ما استطعتم من قوة ومن رباط الخیل ترهبون به عدو الله وعدوكم ] نظم جایی موجبجه تداركات حربیه و تجهيزات عسکریه در . چونکہ دشمن تداركات و استحضرات سفریه ایله تخويف ایدلمش و بصورتله تعدی و تجاوزینه میدان و یرلمیهرك صلح و مسالمتہ میل ایتدیرلمش اولور . نتکم:

« حاضر اول جنکه اگر ایسترایسهك صلح و صلاح »

دینامشدر . حاصلی قوتلی براردو صلح و مسالمتك ای برکفینی اولدیغنه بناءً بوکون هر دولت قوه بریه و بحریه سنی ایجابات عصره



کوره تنظیم و تزئید ایتکده و بو صورته محتاج بولندینی حضور  
و آسایشی تأمین ایلکده در .

## حکومت

حکومت لغته حکم کبی فصل وقضا معناسنه در . حاکم ،  
حکم انفاذ حکم ایدن کیمه در . انجق حکم حاکمن ابلغدر .  
حکم مفرد و جمعه اطلاق اولنور . لکن لسان عرفده حاکم  
طرف حکومتدن نصب اولنان ؛ حکم ایکی کشی بیننده منازع فیه  
اولان بر مسئله یی حل ایچون بالرضا تعین ایدی لان کیسه یه دینور .  
حکومتی ارستطالیس - حکم مطلقک دولت و جمعیت ایچنده  
اجراسیدر - دیه تعریف ایتشددر . مشهود اولدینی وجهله  
نوع بشر انجق جمعیت حالنده یشار . بوا یسه انتظامه ، انتظامک  
حصولیده بر قوته محتاجدر . بوسالده بشرک وجودی اوقوت  
وجودیله قائمدر . اوقوت ایسه قوه حاکمه یعنی حکومتدر .  
حکومت مؤثر بشریه دن اولمیوب حاکم مطلق تعالی و تقدس حضره  
تلرینک تأسیس بیورمش اولدینی بروضع آتیدر . انجق جناب  
حق حکومت و حاکمیتی کرک افراد مخصوصه کرک جماعات معینه  
صورت دائمده بخش و حصر ایتماش اولدیغندن هر قوم مقاصد

مخصوصه سنی استحصاله انسب اولان صورتیه نظام ویرمکه صلاحیت دارد. بوصلاحیته استناداً ام واقوامدن بعضیاری حکومت مطلقه یی دیگر لر ی ده حکومت مشروطه ویا جمهوری یی التزام ایشارد در که شوطاده حکومت اوچ قسمدر : مطلقه ، مشروطه ، جمهوری ده .

حکومت مطلقه : زمام حکومتی تماماً الله آلمش اولان بر مستبدك حکومتیدر .

حکومت مشروطه : ملت مجلسنك رأی وفکرینه اتباع ایدن حکمدارك حکومتیدر .

حکومت جمهوری ده : نسل معیندن منتخب حکمدار مخصوص اولیوب هر کیم اولورسه اولسون افراد ملتدن بری اکثریت آرا ایله بالانتخاب حکمدار مقامنده اولمق اوزره موقتاً رئیس نصب اولنور .

شوالده حکومت قوانین قطعیة مؤسسه یه تابع اولورسه مشروطه ، افراد ماتك مجموعنك ویا اکثرینك رأی واراده سنده بولنورسه جمهوری ده ، قوانین موضوعه و اصول متخذ سنك قطعی اولیه رق یا لکز برکشینك کیف واداره سنه ، و او قوانین و اصولی آرزوسی وجهله فسخ و تبدیل اقتدار واجرا آتسه تابع اولورسه مطلقه اولور .

اصول حکومت بالعموم انسانلر وبالخاصه آوروپالیراره سنده

قسماً یکیدر . چونکه آوروپاءه اولاری حکومت اولیوب اهالی  
 یالکز بر رئیسک اداره کیفیه سنه و پاپاسلرک امر و حکملرینه  
 تابع بولمقده ایدیلر . صوکره لری فنون و معارف ترقیه و باخصوص  
 اندلسده عربلردن انشار ایدن انوار معرفت اوروپا ایچنده  
 پارلامغه باشلادی . پک چوق کتب عربیه علی الخصوص اندلس  
 اعظمندن ابن رشد و ابن خلدون کی ذواتک بر طاقم کتابلری فرنگ  
 لسانلرینه ترجمه ایدلمکله (لا طاعة للمخلوق عند معصية الخالق)  
 کی قواعد جلیله اسلامیه کیمیا آسا تلقی و قبول اولندی و ایشک  
 ایچنه بر ازده یونان قدیم حکمیاتی قارشیدرلقدن صکره :  
 (کوسفند از برای چوبان نیست — بلکه چوبان برای خدمت اوست)  
 حکمی ایله حکمدارک قانوندن ماعدا امرینه اطاعت ایدلمه مسی  
 و قانوندن باشقه حاکم اولماسی و انسانلرک افکار و آمالنده حر  
 و سربست بولمنی کی اکثریسی موافق شریعت بولنان احکام  
 و احوال موضوع بحث اولمغه باشلادی . فیض معرفت سایه سنده  
 افکارلری تنور ایده ایده نهایت حکومت و مدنیتلری شوکور مکده  
 اولدیفمز درجه کماله رسیده اولدی .

نظر اسلامیتده حکومتک حکومت مشروطه اولدیفنی  
 شبهه سزدر . چونکه مسلمانلر حکمدارلرینی کندیلاری نسب  
 و تعین ایلمکده اولدقلرچون خلیفه نک ملت اوزرنده دکل ملتک  
 خلیفه اوزرنده حق حاکمیتی واردر . بناء علیه مسلمانلر خلیفه لرینه

(لاطاعة ... الخ) حدیث شریفی مؤداسنجہ شریعتک  
کوستردیکی طوغری یوله کیتدکجه اطاعت ایدر لر، بالعکس طریق  
حقدن انحراف ایله ظلم وفسادی التزام ایلدیمی اکا متابعدن  
واز کچهرک خلع وتبدیلنی دیناً واجب کوردر لر .

## امامت و خلافت

امامت ایکیدر ؛ صغری ، کبرادر . امامت صغری : نمازده  
امامت، امامت کبرا : مصالح ناسی صیانت ایچون امام الانبیا افندمن  
طرفندن خلافت طریقله ریاست عامه در .

(الخلافة بعدی ثلاثون سنة ثم یکون ملکاً عضواً)  
حدیث شریفی خلفای راشدین حضراتی خلافتارینک علی وجه الکمال  
اولدیغنه اشارت اولوب سائر ائمه مسلمینه دخی خلیفه اطلاق جائزدر . زیرا  
ریاستلری رسول اکرم افندمزدن نیابت صورتیه در .

حمایه بیضه اسلام وتنفيذ احکام، اقامه حدود و تجهیز جنود، جمع  
عشر وزکات وامثالی امور ومعاملات ایچون امت اوزرینه  
نصب امام فرضدر . انجق بعض خوارج ایله ، معتزله دن اصم  
تغلبدن احتراز ایچون « امت دین قویمه تبعیت ایدر سه نصب امام  
فرض دکدر » دیمشاردر .

امامتك شروطى يديدر . (۱) عدالت ، (۲) علم ، (۳) سلامت  
حواس ، (۴) سلامت اعضا ، (۵) اصابت رأى و سياست ، (۶)  
شجاعت ، (۷) قريشى اولمقدر :

اشبو شروطى جامع اولميان ذات منصب جليل دينى اولان  
خلافته مستحق دكلدر . چونكه خليفه عادل اولمازسه ظالم اولور ؛  
ظالم ايسه لسان شريعتده ملعون اولديغندن خليفه اوله ماز ؛  
جاهل ، معاول ، محتل الشعور ، جبين اولورسه احكام شرعيه ي  
تنفيذ ومصالح عبادى رؤيت ايده ميه چكى كې لى الايجاب  
محاربه دن قورقارق حقوقى دينى وامور ناسى حفظ وصيانت  
ايده مز ؛ بويله برعاجز ايسه هيچ بروقت رياست عاميه اهل  
اوله ماز .

شروط مبحوثه امت اصلا اختلاف ائمه مشدركه بونلر  
متفق عليه در . يالكز قريشى اولمق شرطى مختلف فيهدر .  
ابن خلدونك بيانى اوزره بدایت اسلامده قريشى اولمق دفع نزاع  
ايچون شرط قلنميشيدى . چونكه قريشك اقوام و قبائل سائر  
اوزرينه عز و شرفى وار ايدى . اكر قريش دن ماعداده خلافت  
تقرر ايتسيدى ، قريشيلر مخالفت ايده جك وبو وجهه جماعت  
اسلاميه آرمه سنه تفرقه دوشه جك ايدى بو ايسه [ اقيموا الدين  
ولا تتفرقوا فيه ] نظم جليلنه مخالف ايدى . صكره لرى قريشه



بوشرف غالبیت قلمدیغندن خلافتده بوشروطه لزوم کورلمدی .  
ارتحال نبی بی متعاقب بین الاصحاب خلیفه انتخابنده اوچ رأی  
حاصل اولمشیدی :

برنجیسی؛ خلیفه اوله جق ذاتک سیاست اموره و حراست دینه  
اهل و مقتدر بولنمی کیفیتی ایدی . بورأی اکثری انصارک  
مختاری اولوب منتخبلریده ( سعد بن عبادہ ) ایدی . بو  
( اسمعوا و اطیعوا و ان ولی علیکم عبد حبش ) ، حدیث  
شریننه موافق بولندیغندن بالآخره اکثری خوارج ایله عامه  
معتزله بورأی قبول ایلشلردر .

ایکنجیسی؛ خلیفه سیاست و حراسته مقتدر اولمقلاہ برابر  
قریشی اولمسیده مشروط ایدی . بورأیده اکثر مهاجرینک مختاری  
اولوب نامزدلری ابوبکر الصدیق ایدی .

( الائمة من قریش ) حدیث عالیه سیله استدلال ایدهرک  
مؤخرأ اهل سنت بورأیه قائل اولشلردر .

اوچنجیسی؛ خلافت قرابتک احق اولمسی ایدی . بو بی  
هاشم ایله اناره تابع بولنانلرک رأی اولمقلاہ منتخباری حضرت علی  
ایدی . ( اما ترضی ان تكون منی بمنزلة هارون من موسى ) ،  
حدیث شریفیله احتجاج ایدهرک بوتون شیعیلرده بورأی التزام

ایلمشار در .

بواوچ منتجبدين ابوبكر الصديق اكثر تي احراز ايدەرك اجماع  
امتله خايغه انتخاب اولمش وسعدبن عبادە دن ماعداسى كنديارينه  
تبعيت ايلشدر .

بين الامه خليفه انتخابنده درت صورت واردر :

(۱) شوراسى عامه يعنى اهل حل وعقدك انتخابيه اولمقدر .  
حضرت ابوبكر ايله حضرت عاينك خلافتارى كبي . بوبابده عموم  
اهل حل وعقدك بيعت ايتمى شرط دكلدر . بلكه — والا كثر  
حكم الكل — قاعده فقهيە سنجە اكثر تيت كافيدر . نته كسعدبن  
عباده خايغه اول وثانيه واحسابدن بعثياريده حضرت علي يە  
بيعت ايتماشار ايدى .

(۲) شوراي خاصه ايله يعنى خايغه سابقك اختيار ايتديكي بر قسم  
مخصوصك انتخابيه اولور . حضرت عثمانك خلافتى كبي كه  
حضرت عمرك تعيين ايتديكي انتخاب شوراي سستەك راي  
واتخاباريله استخلاف اولنمشدر .

( ۳ ) وصايت ويا ولايت عهد طريقتيدر كه خايغه سابقك  
شرائط خلافتى حائز اولنلردن برينى ولى عهد تعيين ايدوب  
امتك مظهر قبولى اولمسيله منعقد اولور . حضرت عمرك خلافتى كبي .  
مشارايمى جناب ابوبكر ولى عهد تعيين ايتمش وامت طرفندن مظهر

قبول اولمشیدی . عصر اولده خلافت شو اوچ صورتله منعقد اولور و خلیفه اجماع امتله مقام خلافتی احراز ایدر ایدی .

(۴) تغلب و حق سیف طریقیدر که ناس امامتده اختلاف ایدوب هیچ بری دیکرینک خلافتنه راضی اولمازسه ایچارندن سیاسته مقتدر اولانلاردن برینک مقام خلافتنه طالب اولسی جائز اولور ، امت آنک نداسنه اجابت ایدر و اختلاف طرف اوله رق احوال کسب سکونت یارسه خلافتی صحیح اولور .

### خلافتده توارث

خلفای راشدین زماننده خلافت ارثی اولمایوب امت طرفندن بالاستشاره انتخاب اولنور ایدی . حضرت عمر اصحاب شورایه اوغلی عبداللهی انتخاب ایتمه لرینی تنبیه ایتمش ؛ حضرت علی ده جناب حسن حقنده « لا آمرکم ولا انہا کم اتم البصر » دیهرک بو خصوصی امته تودیع ایتمشدی .

خلافتی ارثی قیلان معاویہ بن ابی سفیاندر . مشارالیه بین المسلمین فتنه ظهورندن قورقهرق اهل و مستحق کورمش اولدنی اوغلی یزیدلی ولی عهد تعیین ایلش و بوضورتله خلافت امویارده تقرر ایتمشیدی . یالکتر بونلاردن عمر بن عبدالعزیز خلفای راشدین مسلکده اتباع ایدهرک مشاهیر تابعیندن و فقهای سبعه دن

قاسم بن محمد بن ابوبکر الصدیق ولی عهد تعیین ایتک ایسته دیسه ده  
امویارک تغای سبیلله آکا موفق اوله مامشیدی .

آل عباس طریق معاویہ فی التزام ایتدیلر . یالکزمأمون ،  
عمر بن عبدالعزیز کبی ، چهار یارکزمین مسالکنی بالالتزام خاندان  
علیدن علی رضا بن موسی کاظمی ولی عهد تعیین ایتمشیدی . فقط  
بونی عباسه کرا . کله رک مأمونک بیعتی نقض ایله عمو جهمی  
ابراهیم مهدی یه بیعت ایتدیلیرسه ده ولی عهد مشارالیه کجاء  
وفاتی وقوع بولان بونی وفسادی تسکین ایلش وبوندن صکره ده  
هیچ برکیمسه دیگر خاندان ولی عهد تعیین مسئله سنی اورته یه  
قویه مامشیدی .

آل عثمانیه بنی عباسه اتباعاً خلافتی ارثی اوله رق اینا ایدیلر .  
آل عثمان ابتد الرنده مقام خلافتی حائر اولموب یالکز حق حکومته  
مالک ایکن ۹۲۳ تاریخنده خلافت بی عباسدن کندیلرینه انتقال ایتش  
اولمغه خلافت و حکومتی جامع اولمشادر . خاندان آل عثمان  
خلافت و امامته استحقاق لری بر وجه آتیدر :

اولا : عثمان یارک برنجی خلیفه سنی بولان سلطان سلیم خلافت  
اسلامیه بی دست کفایتله الدینی زمان کمدوسنه قارشو طوره حق  
بر حکم دار یوق ایدی ، درایت و اعلمتی ده ایتی جاییه بالغا  
سایلغ کان ایدی .

تایاً : اخر خلفای عباسیه اولان متوکل عن الله سلطان

سایمک کفایتی تقدیر ایدمرك خلافتی اكا ترك وتودیع اتمش  
وبو کیفیت اهل حل وعقد طرفندن عموماً مظهر قبول اولمشیدی.  
حتی علمای مصر و علمای رومدن مرکب بر مجلس عمومی  
سلطان سلیمی خلیفه انتخاب ایدمرك سیف شہامتی انک میان ہمتہ  
باغلمشاردر . ایستہ جلوسی متعاقب اجرا ایدیلاں تقلید سیف  
آیینی بوندن نشأت ایشدر .

ثانیاً : سلطان سلیم قبلہ کاه مؤمنین اولان حرمین محترمین  
خدمت موجب المفخرتی ید کثایتہ آلدینی کبی الی یومناہذا  
سلاطین عثمانیہ دہ بو خدمت مقدسہ ایلہ مباہی بولمقدہ در .

رابعاً : خاقان مشار الیہ امانات مبارکہ بی دست امنیتہ آلہرق  
حفظ وحمایہ ایشدر . الحاصل صفدر دوران سلطان سلیم خان  
حق سیف ووداعت و شورای عامہ ایلہ مقام جایل خلافتی  
حائز اولمشدر .

الیوم پادشاہ زمان سلطان محمد خان خامس حضرتلری دہ  
ماتک انتخابیلہ اجتماع ایدن وبا فتوای شرعی اهل حل و عقد  
اولدینی ثابت اولان مجلس عمومی ملت طرفندن بالانتخاب  
کرسی خلافتہ اجلاس ایدملکہ بالعموم مسلمانلرک خلیفہ سی  
و بتون عثمانیلرک پادشاہیدر . خلیفہ بالحقہ اطاعت لازمہ دیانت  
اولدیغندن بالاعل تابعیت سلطنت سنہ دہ بولنمان مسلمانلرک  
دخی معنا او مقام قدسیت اتسامہ ارتباط دینیلری شرعاً وعقلاً

مبدانده در . بوکا بناء در که هندده ، اقصای شرقده و الحاصل  
کافه بلاد اسلامیه ده نام عالی جناب خلافتیناهی به خطبه او و مقدمه  
و معنا اطاعت و انقیاد اولتمقدمه در .

بوده اثبات ایدر که مقام خلافتك مقام سلطنت سنیه اولدیفنه  
یا لکزه عثمانیلر جه دکل بالعموم مسلمانلر جه اجماع حاصل اولمشدر .  
اره صره یمنده اوفاق بر دائره ایچنده ادعای امامت و یا خود  
اقصای غربده بر حکومت و امارت طرفندن در میان اولنان  
دعوای خلافت شرعاً بر وجهه حائر اهمیت دکلدر . چونکه  
بونارده خلافتك شروط اساسیه سندن اولان شوکت و سیاست  
و حراست دینه قدرتدن اثر یوقدر . بناء علیه بونارک حوزة  
حکومتده اولاناری نظر شرعده باغیازدر .

## وزارت

مقام خلافتده بولنان ذواتك امور و مصالح دولتی بالذات  
تدویر و رؤیتاری قابل اوله میه جنی جهته کنیدیلرینه ظهیر  
و معاون اولوق اوزره وزیر استخدام ایتاری ایجابات شرعیه  
و سیاسیه دن و لوازم حکومت و خلافت اسلامیه دندر .

[ و لقد آتینا موسی الکتاب و جعلنا معه اخاه هرون

و زیرا ] نص جاییلی و ( من ولی شیئاً من امورا الناس



واراد الله به خيراً جعل له وزيراً صالحاً ان نسي ذكره  
وان ذكر اعانه (حدیث شریفی ایلہدہ وزارتک لزومی ثابتدر۔ مأل  
عالیٰ حدیث - عہدہ سنہ خلقک اموری تفویض اولنا لک حسن  
موفقیتارینہ ارادۃ الہیہ تعلق ایدر ۔ اویلہ صالح بر وزیرہ مقارن  
قیلارکہ اونوتدینی شیلری کندیلاریئہ اخطارده، صکرہدہ مقتضاسنی  
اجرا ایچون معاونتده بولنور - دیمکدر ۔

سلطان انیا افندمزده وزیر استخدام ایتشار و بو خدمت  
مبجلہ ایلہ شیخین حضراتی بکام بیورمشلردر ۔ حضرت صدیق  
جناب فاروقی ، مشار الیہدہ حضرت علی بی و دیگر اصحاب  
کرامدن بعضیلرینی وزیر اتخاذا ایشلردر ۔

بین الخلفا امر وزارتہ اهتمام و اعتنا ایدلمش اولدینی حالده  
خلفای عباسیہ زمانہ قدر وزارت غیر رسمی و یالکز فعلی  
و عملی اوله رق دوام ایتمش ، خاندان عباسیہ ایسہ وزارتی بر  
مسند مخصوص اولوق اوزره رسماً تأسیس و توجیہ ایشلدر ۔

وزیر ، کلمه سنک اشتقاقده علماء سیاست اوچ وجهلہ  
بیان مطالعہ ایتشاردر :

برنجیسی : وزارتک اغراق معناسنه اولان « وزیر » دن  
مشتق اولمسیدر ، بوکا کوره وزیر ، حکومتی در عہدہ ایدن

حکمدارک بارثقیل مسئولیتنه معاونت و رأی و تدبیری ایله تخفیف اوزارینه خدمت ایدن ذات دیمکدر .

ایکنجیسی : وزارت ملجأ و پناه معناسنه کلان « و ز ر » دن مشتقدر . بورایه نظراً پادشاه وزیرک تداییر صائبه و آرای ثاقبه سنه التجاده بولنش و تسویه مصالح حکومتده حکمدارک ملجأ و پناهی اولمش اولور .

اوچنجیسی : ظهیر وقوت معناسنه اولان « آ ز ر » دن مأخوذ اولمسیدر . بو فکره کوره پادشاه وزیرک رأی و عرفانی و حسن تدبیری ایله قوی الظهر اولور دیمکدر . صفات لازمه وزارت ؛ شریعت و سیاست نقطه نظرندن آلتیدر :

برنجیسی : سلامت حواس و اعضاادر . لساننده ویا سمع و بصرنده آفت و سیر و حرکتنه مانع اوله جق درجده اعضاسنده نقصانیت بولنانلر وزیر اوله مازلر ؛ چونکه بوکی نقائص ایفای وظائف وزارتیه برر مانعه تشکیل ایدرلر .

ایکنجیسی : علم و معرفتدر . وزیرک امور معظمه دولتی اداره ایدجک مرتبهده اصحاب علم و وقوفدن اولمسی شرطدر . زیرا وزیرک جهلندن نشأت ایده جک اولان اوافق بر خطای اجتهادی دولتک باشنه بیوک بلالر کتیره بیلیر .

اوپنچیسى : عدالتدر . شرائط شرعیہی جامع عدالتدن محروم بوانانلر منصب وزارتہ اهل اولہ سازلر .

در دنیسی : متانتدر . مصالح جاریہی و امور سیاسیہی تدبیر ایچون وزیرك رأى متین صاحبی اولسی لازمدر .  
 بشنچیسى : نجات و شجاعتدر . محافظه بلادہ و عندالایجاب مجاہدہ اعدایہ مقتدر اولہ میان برجین رتبہ وزارتہ لایق و مستحق دکلدر .

آلتنجیسى : کفایت و اقتداردر . امور حربیہ و خصوصات مالیدہ وزیرك صاحب کفایت و اہلیت اولسی شرط اہمدر .

حکومت اسلامیدہ وزارت ایکی نوعدر : بری وزارت تفویضیہ ؛ دیکری وزارت تنفیذیدر .

وزارت تفویض ؛ حکمدار طرفندن وکالت مطلقہی حائز اولان صدر اعظمك وزارتیدر . چونکہ امور حکومت پادشاہ طرفندن صدر اعظمہ تنویض اولمش و مصالح دولتك رؤیت و تسویہ سنہ وکیل و مافون بولنمشدر . شو خالدہ صدر اعظم رأى ذاتیسیلہ بالجلہ امور و معاملات دولتی اداره ایدر . والی ، متصرف و مأمورین سائرہی نصب و تعیین و امور مایہ و خصوصات داخیہ و خارجیہی حسب الوکالہ تدبیر و تدویر ایلر، آنک وظیفہ سی خارجندہ قالا نلر همان محدود اولور . مثلاً ؛ حکمدار

ولی عهد تعیین ایدر. وزیر مفوض بویه براقدراره مالک اوله ماز. پادشاه وزیرك نصب ایتدیكى ولایه و مأمورینی عزل ایدر. وزیر ایه پادشاهك تعیین ایلدیكى مأموری عزل ایده مز.

وزارت تنفیذ، حکمدارایله اهالی بیننده اجرای وساطتدن عبارت بر مأموریتدر. بو وزیر امور دولتی تدویره و مهمانلکی رؤیت و تسویه مآذون و موکل دکلدر. انک وظیفه سی همان ایکیه منحصر کبیدر. بری خلیفه عراض معلومات، دیکری حکمدار نامه اجرای تبلیغاتدر.

حکومت اسلامیة وزارت یالکز بر وزیر منحصراولم یوب ایکی ودها زیاده جواز ویرلشددر. نتکیم حکومت عثمانیه ده بونی التزام ایدر لك مسئول بر هیئت وکلای ترتیب و قبول ایلش و بو کیفیت مشروطیت مشروعه مزائه ایجاباتندن بولنشددر.

## مشورت

[و لتسکن امة یدعون الی الخیر و یأمرون بالمعروف

و ینهون عن المنکر] آیت جایله می که معنای منیفی - سزدن ناسی خیره دعوت ایدر و امر بالمعروف و نهی عن المنکر ایلر بر جماعت بولونسون. - دیمکدر که مشورتك مشروعت و لزومنه دلالت ایدر.

معروف : شرع وعقلک استحسان ابتدائی ، منکر : شرع وعقلک قبیح کوردیکی شیردر . نظم جایلدہ کی خطاب عمومیدن امر بالمعروف ، نہی عن المنکر بتون امت اوزرینہ فرض اولدینی و آنجق بوامر مهمک اجرایی احکام الہیہ ووقوف و معاملات ناسہ آشنا اولنق کبی برطاقم قیود ایله مقید بولمنسہ نظر آہونک فروض کفایہدن اولدینی استدلال اولنمقدہ و امت آرہسندہ بو وجیبہنی آنجق اہلیت وفضلیت ایله تمیز ایدنارک درعہدہ ایدہ بیلاہجکاری آکلاستہمقدہدر . چونکہ امر بالمعروف نہی عن المنکر ہرکس بالذات تصدی ایدہجک اولورسہ منفعت یرینہ مضرت حاصل اولہجفی شہہسزدر . زیرا شروط مذکورہیہ واقف اولیانلرک منکر ایله امر ، معروف ایله نہی ایتلاری ملایمت یرندہ غلغلت ، غلظت یرندہ ملایمت کوسترلاری محتمل وبناءعلیہ فائدہ یرینہ ضرر ایقاع ایتلاری ملحوظ و متبادردر .

شو حادثہ فرض اولان امر بالمعروف ، نہی عن المنکرکہ بولنہجق یعنی ملک وملتک صلاح و سعادت دوشونہجک وبالہ ستشارہ امور امتی تدویر ایدہجک اولان ہیئت شورانک برہیئت نشہ و تمیزہ اولمسی و بوجہتہ مشورتک بر امر مشروع بولنمسی آیت کریمہ نک بیانات عالیہمی جمہسندندر .

[ و امرهم شورى بينهم ] [ و مشاورہم فی الامر ] نظم

جلیل‌الدری بالخاصه امر مشاوره‌نک مشروعیتی حق‌ننده شرف‌نازل ۱  
اولان آیات بینات‌ندرد .

کتاب‌الله‌ایله منصوص‌بولان‌ان‌امر مشورت ( المشاورة حصن  
من الندامة و امان من الملامة ) و ( لقحوا عقولکم  
بالمذاکرة و استعینوا امورکم بالمشاورة ) و ( ماخاب  
من استخار و لا ندم من استشار ) کبی احایث پیغمبریه‌ایله‌ده  
ثابت‌درد .

بنی اکرم افندم‌زده دائماً اصحاب کرام‌لریله مذاکره بی‌وریرلر  
و مصالح‌امتدن پک چوغنی بالاستشاره فصل و قضا ایدرلردی .  
غزوه خندق‌ده اعداء‌ایله برلشمش اولان غطفان‌لرک ترک‌مخاصمه  
ایله یرلرینه عود‌تاری ایچون مدینه منوره اثمارینک ثلثی ویره‌رک مصالحه  
اولنمسنی طرف رسالت‌پناه‌ی‌یه عرض ایدن اصحابدن بعضیارینه افندمن  
( حتی اشاور السعود ) یعنی سعدبن معاذ و سعدبن عبادہ  
و سعدبن فزاره ایله مشاوره ایدیم بیورمشار وانلرله مشاوره  
نتیجه‌سی برشی ویرلمه مک کیفیتی اولمغله اولوجه‌له عمل بیورمشاردرد .  
اصحاب کرام حضر اتیده سنت سنیه‌یه اتباعاً عمومیتله مشورت‌ده  
بولنورلر و هر خصوصده مشورتی کندیلرینه رهبر اتخاذایلرلر  
ایدی .



حضرت عمرؓ امر مهم خلافتی شورایہ تودیع و مجلس مشورتی دخی تعیین بیوردقلری معلومدر .

حضرت حیدر مشورتی توصیه ایدر واندہ یدی خصلت اولدیغنی سویار ایدی . انلرده ( ۱ ) استنباط صواب ( ۲ ) اکتساب رأی ( ۳ ) خطادن تحصن ( ۴ ) ملامتدن تحرز ( ۵ ) ندامتدن نجات ( ۶ ) الفت قلوب ( ۷ ) اتباع اثردر .  
اشته بونلر دلالت ایدرکه : اسلامیتده استبدادوتفردمقدوح و ممنوع ، استشاره واشتراك ایسه ممدوح ومشروعدر .

استشاره نك صورت اجراییه سینه كلنجه بونكچون برحد معین یوقدر . ایجابات زمانیه کوره حرکت اولنور . صدر اسلامده اداره حكومت بسیط وساده وامتك فضائل اخلاقیه ومحاسن فکریه لری سایه سنده معاملات ناس هر درلو شوا بندن آزاده ولمعله برابر خصوصات مهمه ایچونده اکثری مسجد شریعه اجتماع ایدرک مذا کره ومشاوره بیوریلور وبوصورتله اداره امور اولنور ایدی ،

اوائل دولت علیعه دخی امور حکومتده مشورت اولنور . واحوال فوق العاده سنجاق بکلری واوجاق اغالری کبی امور دیدم وکار آزموده برطاقم اعیان ملت جمع ایله مجلس مشورت عقد اولنور وانلرک رأی لری سور وور ایدی . انقسطوت حکومت اکثریا بونلرک رأینه غلبه ایدرورای حکومت حکمران اولور ایدی .

شمدی ایسه بمنه تعالی مشروطیت مشروعیه و حریت اساسیه  
تأسس ایتمش اولمغله فر زماننا لازم اولان شی ، امور کورمش  
ملککتک تجارت ، زراعت و قابلیت استعدادینه وقوف حاصل  
ایش و بین الامه امانت واستقامتله شهرت بولمش علمادن ،  
امرادن ، تجارت و هر صنف کزیدکانندن بر طاقم ذواتک مبعوث  
اوله رق انتخابیله انلارکده امور دولت و مصالح ملتی عدل و حقیقت  
دائره سنده رؤیت و تسویه یه نصب اهتام ایلمارندن عبارت قالیر .

مشورتدر ناظم احوال ملک وسلطنت  
مشورتدر امته مصباح مجد ومسعدت  
مشورت هرا مروکار مشکلی آسان ایدر  
حضرت حق لطف ایدوب توفیقنی احسان ایدر

اقرن برأیک رأی غیرک واستشر  
فالحق لایخفی علی الاثنین  
للمرء مرآة تریه وجهه  
ویری قفاه بجمع مرآتین

ان اللیب اذا تفرق امرء  
فتق الامور مناظرأ ومباشرا  
واخوالجهالة یتبد برأیه  
فتراه یعتسف الامور مخاطرأ

حاصلی بالاده ذکر و اتیان اولنان آیات جلیله قرآنیه .  
 اقوال و افعال سنیه نبویه مشورتک وجوب مشروعتی اثبات  
 ایتمکده اولدینی و مشورته کسب استحقاق ایتک ایچون صفات  
 لازمه اهلیتهده اعتنا اولمنی و صایای شرعیه و مقتضای سنن  
 نبویهدن بولندینی ثابت اولمقدهدر . بناء علیه کنديسيه استشاره  
 اولنهجق و راینه مراجعت ایدیلهجک ذواتک حال و شانلری  
 نظر اعتباره آلمق لازمدر . صفوت فکر ، جودت قریحه ،  
 قوت نفس ، سلامت حس ، وقوف واطلاع ، تجربه امور ،  
 صدق وصلاح کبی اوصاف ، اسباب اهلیت و کفایت جمله سننددر .  
 بورالر معلوم اولمقدن صکره آرتق به ترتب ایدن وظیفه  
 موافق شرع شریف اولهرق تأسس ایتمش بولنان مشروطیتمزک  
 قدرینی بیلهرك مجلس مشورتهکی وکیل و مبعوثلریمزک مظهریت  
 و موفقیتلرینی تمی ایتک و شونخشایش ربانیک شکرینی ایفا  
 ایلکدن عبارت قالیر .

## احكام بغات

بغات : بغیرحق خایفیه اطاعتدن خروج ایدن فرقه  
 عاصیهدر . اهل خروج اوچ قسمدر :  
 برنجیسی : قطاع طریقدرکه اطاعتدن خروج ایله قتل  
 نفوس و غصب اموال فضایلخنده بولنان و ابنای سبیلک امنیتنی  
 سلب وازاله ایلایان گروه اشقیادرکه بوده درت قسمدر :

(۱) شقاوت و قطع طریق جرأتندہ بولنوب انحق قتل و غصب کبی  
برکونہ مفسدت ایقاعنہ فرصتیاب اولمہ دن اخذ و گرفت اولنا نلدر درک  
بونلرک جزالری تعزیر و ضربدن صکرہ حبس و توقیف ایدلمکدر.  
[اوینفوا من الارض] آیت کریمہ سندہ کی نفی دن مراد بوجہ سدر.

(۲) یالکز سرقت و غصب مال ایدنلدر. بونلرک شرعاً جزالری  
سرقت ایتدکلری مال بهری ایچون نصاب سرقتہ (۱۰) درهم  
کموش و یا بوقیمتدہ اولان برمال ( بالغ اولورسہ علی الخلاف  
برالی و برایغی قطع اولنمقدر.

(۳) یالکز قتل نفوس فضیحه سندہ بولنا نلدر. بونلر  
جزاء یعنی «حداً لأقصاصاً» قتل اولنوب نمازلری قیلنمیہ رق دفن  
اولنورلر. بوبادہ ولی مقتولک عفو ی صحیح دکدر.

(۴) قتل نفوس و غصب اموال جرأتندہ بولنا نلدر.  
بونلرک جزالری ایسہ شوالتی صورتدن بریلہ در اودہ :  
اولا قطع صکرہ قتل و یا قطع بعدہ صلب و یا ہراوچینک اجراسی  
یا خود قتل و صلب یا خود یالکز قتل و یا یالکز حیا صلب  
اولنمقدر.

اہل خروجدن ایکنجیسی : بغادرکہ عن تاویل دائرہ  
اطاعتدن خروج ایلیان زمرہ در. بونلرہ اولا نصیحت ایدیلہرک  
شبهلری دفع و ازالہ اولنور و انقیاد و اطاعتہ دعوت ایدیلور.  
فکر و عصیانلرنده اصرار ایدرلرہ قتللری ولدی الایباب حصر

وتضيق ایدملری لازم اولور . اسیرلرنده خایفه مخیردر؛ استرسه قتل ایدر استرسه توبه ورجوع ایدنجهیه قدر حبس ایلر .  
 اهل بنی ایله حرب ایدوب قتل اولنانلر شهید اولمغه بلاغسل قانلریله دفن اولنور و نمازلری قیلنور باغیلردن قتل اولنانلر ایسه غسل و تکفین ایدیلهرک بلا صلاة دفن ایدیلور .  
 اوچنجیسی : خوار جدر بونارده عن تأویل عصیان ایدرلر-  
 سهده بغات کبی یالکز اطاعتدن خروج ایله قالمیهرق مال و جانی استحلال و مذهب و عقائدی استقباح کبی برطاقم مفاسدی التزام ایدرلرکه بونلرک حکم و جزاسی بالاتفاق بغاتک جزاسی کبیدر .  
 نکیم حضرت علی بوناری قتل و جمعیتارینی پریشان ایلشدر .  
 بونار لسان پیغمبری ایله ملعوندر ( الفتنة نائمة لعن الله من ايقظها ) حدیث شریفی مضموننده داخلدرلر .

## قصاص

( ولکم فی القصاص حیوة ) جناب حق بو آیت کریمه سنده قتل نفس ایچون مهابت افزا بر جزا تعیین بیوررکن ازاله حیاتدن عبارت اولان قصاصی ضدی بولنان حیاته ظرف قیلمش و قصاص ایچنده حیات بولندیغنی بیان بیورمشدر . فی الحقیقه برکیمسه دیکرینی قتل ایلدیکی حائده قصاصاً کندیسکند قتل ایدیه جکینی ملاحظه ایدنجه قتلمدن فراغت ایلر بوجهته قصاص

قاتل ایله مقتولدن ہر ایک سنک دہ حیاتی محافظہ ایلر .

قاتل اولیای مقتولک کندیسنی قتل ایدہ جکلرینی دوشونہرک  
نفسنی صیانہ انارکدہ قتلانہ تشبث ایدہ جکلندن قصاص ایدیلنجه  
انارک حیاتلری محافظہ ایدلمش اولہ جنی کبی قاتلک قصاصاً  
اعدامندن دیکرلری عبرت آله جنی جہتلہ بویوزدن برحق  
قتلرکدہ اوکی النمش اولور بنام عایہ قصاصدہ حیات عظیم واردر .  
قتل حرامدر وبش قسمدر .

برنجیسی : قتل عمددرکہ معصوم الدم اولان بر آدمی  
آلت جارحه ایله قصاصاً اوروب اولدرمکدر .

ایکنجیسی : شبه عمددرکہ مصون الدم اولان بر شخصی  
آلت جارحه دن بشقه — صواب و طاش کبی — برشی  
ایله قتل ایلمکدر . امامین حضراتی قتل عمدی : وصف سابق  
حائز اولان بر آدمی وجود انسانینک تحمل ایدہ میہ جکی برشی ایله  
قصداً اوروب اولدرمکدر دیہ تعریف ایتدکلرندن شبه عمد  
مشار انہمایہ کورہ قتل عمددر .

اوچنجیسی : قتل خطادرکہ بر آدمی قصده مقرون اولمقسزین  
یا کلشاق ایله تلف ایلمکدر . بو خطا ایکی نوعدر بری : فاعلک  
ظنندہ خطادر — آ و ظنیہ برینہ قورشون آتوب آتی تلف  
ایلمک کبی ، دیکری : فاعلک فعاندہ خطادر ، صیدہ آتیلان  
قورشونک بر آدمہ اصابتلہ قتل اولمنی کبی .



دردنخیمی : خطا مجراسنه جاری اولان قتل درکه فاعلین  
ایجاب صدور ایدن قتل در یوکسک بریردن قضاء بر آدمک  
اوزینه دوشوب آنی اولدرمک کی .

بشنجیمی : قتل سبیدر یعنی بر آدمک قتلنه سید اولمقدیر،  
غیرک ملکنه صاحبک اذنی اولمقنیزین بر قیو قازوب اکا  
یلیمیه رک برکیمسه نک دوشوب اولمی کی .

اقسام مذکوره دن قتل عمدک موجی [کتب علیکم القصاص  
فی القتل] نص جلیلی وجهله قصاصدر. چونکه قتل عمد بر  
جنایت کامله اولدیغندن اکا ترتب ایدن عقوبتک ده عقوبت کامله  
اولمی لازمدر .

آنحق خواجه عالم شارح اعظم افندمر ( ادرؤ الحدود  
بالشبهات ) بیوردقارندن وحدوده قصاص ده داخل بولندیغندن  
فعل قتله شبهه قائم اولدقجه قصاص اجرا ایدلیه رک تعزیر ایله  
اکتفا اولنور .

قتل عمددن ماعدا قتللرک موجی دیتدر . آنحق شبه عمدده  
برکیمسه دیکرینی صولایله ضرب ایدوب اوضربدن مضروبک  
برعضوی مجروح اوله رق متأثراً وفات ایلسه قصاص لازم  
اولور .

تسببا قتلده دیتک لزومی متسببک قتلده سببیت ویردیک فاعلی  
حقسز اوله رق ایشله مسیله مشروطدر. متسبب حتمی اولورسه  
اکا دیت لازم کمن. مثلاً برکیمسه کندی ملکنده برقیوقازوب  
اکا بری دوسته راء تائف اولسه متسبب کندی ملکنده تصرف  
ایدوب فعل حفرده متعدی اولمديغندن دیت ایجاب ایتمز.

تسبباً قتلدن ماعدا قتلر حرمان ارث ووصیتی یعنی مقتولک  
میراث ووصیتندن قاتلک محروم بولمنسی موجب اولور.

قتل عمدده بر مقتضای حدیث شریف شبهه بولنورسه قاتلدن  
قصاص ساقط اولماقه برابر قتل کبی بر معصیت عظیمه یی ارتکاب  
ایلدیکندن قاتل تعزیر مستحق اولدینی کبی شبهه عمدده دخی  
دیتک لزومیه برابر قاتله تعزیر لازم کلیر.

### تعزیر

تعزیر: لغتده مطلقاً تأدبدر. اصطلاح شرعده حدک  
مادوننده اولان تأدیه اطلاق اولنور. حد ایله عزیر بیننده فرق  
واردر.

حد: حقوق الهیه دن اوله رق واجب الاجرا بر عقوبت  
مقدرده در، یعنی کتاب، سنت ویا اجماع امت ایله بیان ایدلمش  
بر جزادر.

تعزیر ایسه: عقوبت مقدره اولیوب رأی امامه منوضدر  
برده حد شبهات ایله ساقط اولوب تعزیر ساقط اولماز احوال

ناس متفاوت اولمقله تعزیرك درجاتی ده مختلفدر . كاه توبیخ ، كاه حبس ، بعضاً ضرب ، بعضاً ده قتلدر . علی قول اخذمال ایله ده تعزیر اولور .

انجق تعزیرده مصلحت عامه بولمقی و تعزیری موجب اولان حال دخی غلبه ظن حصوله کافی امارات و قرائن ایله ثابت بولمقیدر .

## الوهیت

جسمی اوچ آرشون بر مزاره صیغان فقط کبریای ادراکی عالمده صیغیان انسان ؛ نظر تجسسی بتون کائناته و عرش رحمانه قدر اماله ایتمش و عالمی کف ادراک کنه صیغیر مغه چالشمشدر . هنوز برپاړانك ، برقبضه خاكك ، برقطره صویك نه دن عبارت اولدیغی بیامدیکی بر زمانلرده بیله قدرت محاکمه سنی بوکی عظیم مسائلك حلی ایله اشغال ایش ، کندی ماهیتندن برشی بیامز ایکن انظار تحریمیله واجب الوجودی آرامشدر . بوتحریسنده — مشعله بارقه افشانی ؛ مهبط اسرار و الهام اولان وجدانی اولدیغندن — موفقه اولمشدر ، چونكه ، — الله وار ، — دپمشدر . مع هذا بشریتی بیکارجه سنه در اشغال ایدن اك مهم مبحث شبهه یوقدر كه ( الوهیت ) فکریدر .

فکر بشرك تاریخ تکاملی نظر امعانه النیرسه کوریلور كه انسان الوهیت عائد خصوصاً بده رقیب شکل و صورت بولدقن صکره بونلره دیکر

بر شکل علاوہ سندہ اظہار عجز ایسدر . یعنی الوہیت فکری  
چوقدنبری حدغایہ تکاملی بولش اولوب آرتق بوفکر  
حقندہ بشریتک ترفی کوسترمی ویکی برشی بولمی غیر  
ممکندر .

الوہیت فکری ایچون ادراک انسانیده اوچی مثبت وبری  
منفی اولق اوزره درت صورت واردر (۱) فکر تشبیهی (۲)  
فکر تنزیہی (۳) فکر توحیدی (۴) فکر انکاری .

فکر تشبیهی . — صانع تعالیٰ حضرتلرینی محسوسات و مادی بدن  
برشیئہ تشبیه ایلک ، اوکا محسوس و مادی بر موجودیت ، بر جسم  
عطف ایلکدر بوفکر ایکی صنفه تقسیم ایدیله یایز .  
(۱) آدم پرستی .

(۲) اشیا پرستی .  
اشیا پرستی ؛ پت پرستلک دیمکدر . اقوام وحشیہ و ابتدائیہ  
مخصوص اولان بوصورت فکرده هیچ بر علویت ، هیچ بر حکمت  
یوقدر . بویله بر دینہ سالک اولانلر سائق یالکز خوف و منعتدر .  
آدم پرستیده ایسه دین برشور و خیال شکلنی آیر . اسکی  
یونانیلرده بوشکل شاعرانه و قدیم هند و مصر لیلارده کی بوشکل  
خیالکارانه حدغایہ بی بولمیشیدی .

افراط پروراندن بعضیاری دیرلرکه بالجمله ادیانده و فکر الوہیتک هر  
شکلنده آدم پرستیدن بشقہ برشی کور و ملزوم نہ شکلده تصویر ایدیلورسه  
ایدلسون ، نصل سوزلرله افاده اولنورسه اولنسون فکر الوہیت عندالتحلیل

بر آدم پرستیدن عبارت در . بود عوانک آنحق بر قسمی طوغریدر .  
(اناعندظن عبدی بی ) حدیث قدسیسندہ براعجاز وایجاز  
ایله خبر ویرلدیکی اوزره عامہ بشرک عنقای عقلی انحق کندی  
حدودینہ قدر طیران ایدہ بیلور .

خرستیانلرک حضرت عیسانک الوہیتہ ، قتلکلرک پاپانک  
لاخطیایکنہ ، نصیری ودرزیلرک حاکم بامراء حقندہ کی اعتقادات  
باطلہ یہ قائل اولشلی ہپ آدم پرستیک محصولیدر .

استطراد نصارا آدم پرستیک محصولدن اولہرق  
حضرت عیسایی بیولتہ ، بیولتہ الوہیت درجہ سنہ واردیر مشاردر .  
نبی ذیشانہ ( انسان اللہ ) دیدکلری کی ( اللہ انسان ) دخی  
دیمشاردر . بوکی مشوش تعبیرلردن مقصدلری جناب عیسادہ  
حقیقت الہیہ ایله حقیقت انسانیہ نک اجتماع ایتدیکی ودها طوغریسی  
عیسانک ہم اللہ ہم انسان وحتی تام اللہ ، تام انسان اولدیغنی  
بیایدیر مکدر . انحق قدرت الہیہ نک بیلہ تعلق ایتدیکی بوکی جمع  
اضدادہ ودها برچوق امور متباینہ و متخالفہ فی تالیفہ عالم  
نصرانیت کندندہ براقتدار کورمشدر .

نصارانک زعمنجہ ؛ ابوالبشر حضرت آدم شجرہ ممنوعہ دن  
اکل ، یعنی جناب حوا یہ تقرب ایتدیکندن طولانی درجہ  
ملکیتدن درکہ بشریتہ سقوط ایتمش ، غضب الہیہ روحار  
اولمشدر . وفاتندن صکرہ دہ ارتکاب ایتدیکی شو جنایت عظیمہ دن

ناشی نار جحیمه آتیلمش وشومعصیت اولاد واحفادینه ده  
 انتقال ایدرک هربری بعدالوفات بابالرینک دوچار اولدینی عذاب  
 جحیمده اکا پیرو اولمشلردر ، انجق انیا ومرسلین حضرتاتک  
 شانلرینه حرمة آنارک ارواحی جهنمه ایصال ایدلمه مش ،  
 فقط معصیت آدمدن بری جتنک قبولریده قیامتیش اولدیغندن  
 آنارک ارواحی جتنک کشادینه قدر اعرافده توقیف ایدلمشدر .  
 صکره جناب حق کمال لطف وکرمندن انسانلری شوکرداب  
 بلادن ، جداءالرینک اومعصیتندن خلاص ایتک ایستر لکن  
 نصل قورتارملی ؟ برکره کندیسیری برشی امر ایتمش ، « آدم » اکا  
 انقیاد ایتمه مش قانون الهی یه توفیقاً « آدم » دوچار مجازات اولدینی  
 کبی قانون وراثت موجبجه بو حال اولادلرینه ده سرایت ایتمش  
 بونلری عفو ایدیویرمک اوقانونی بوزمق دیمکدر . بوایسه قابل  
 دکلدر . ائک قابل اوله بیلیمسی ایچون اوکناهدن وارسته برکیمسه  
 اولملی ، نفسی فدا ایتلی بعده جمعیت بشریه یه شفاعت ایتلی لکن بونی  
 کیم باپه حق ؟ دنیایه کیم کلیرسه معصیت موروته یوکنک آلتنده  
 ازیلهرک کلیور . اوله برمعصومی زرده بولملی که شفاعته اهل  
 اولسون ؟ انیا ومرسلین وبالجمله نوع بشر ایچنده معصوم بر فرد  
 بولنمور . انجن برذات وارکه انسان ذریتندن دکل . اوده ابن الله  
 جناب حق بو اوغلنی فدا ایدرسه مقصد حاصل اوله حق ، جمعیت  
 بشریه عذاب ناردن قورتیله جقدر . شو قدر وارکه : ابن اللهک



اللهم بن بشقه برشی اولدینی ظن ایدلمه مایدر. اوغلی ذه کندیسیدر.  
شو حالده ابن الله صفتیله کندینی فدا ایده جکده اودر .

جمعیت بشریه نك تخلیص ایچو : خالق عالم حضرتلری روح -  
القدس واسطه سیله اوغلی عیسای جناب مریمه القایتمش وانندن دنیایه  
کیشدر عیسا کنه کار انسا نلر اوغرنده برچوق آلام واکداره معروض  
اوله رق ونهایت چارمیخه کر یله رك اولمش ، دفن ایدلمش ،  
جهنمه اینمش ، اوچنجی کونی دیر یله رك وسماواته صعود ایدرك قدر  
مطلق پدرك صاغ جانبنه اوتورمشدر . اورادن یوم قیامتده تکرار  
کله جك ، اولولری و دیر یلری محاکمه ایده جکدر . [ علم حال نصاری ]

### تثلیت

نصارا: اب ، ، ابن ، روح القدس دن عبارت اولان اشخاص  
ثله نك تشکیل ایتدکلری الله واحده «تثلیت» نامنی ویررلر . بونلرك  
اشخاصی بشقه اولوب قادر مطلق سماواتده مقام مخصوصنده سلطنت  
نشین اوله رق ابن صاغ طرفنده ، روح القدس صول طرفنده  
طور مقده ایسه لرده ینه بونلرك اوچندن عبارت اولان [ الله ]  
بردر . ابده الله ، ابنده الله ، روح القدس ده الله در . لکن اوچ  
دکل بر الله در . فقط بونلرك نه دیمك اولدینی اکللا شلمیور . و بونلره  
عقل ایرمیور دکلکی ؟ ذاتا اولره عقل ایردیره یم دیمك نصرا -  
نتیجه کفر در ، بولر سرائر نصرا نیتدندر ، قورجالمغه کلز .  
اولدینی کبی قبول وایمان ایتك خرستیانا نك انجباتدندر .

بره مسئله وارد خاطر اولور. اوده ، ابن الله عیسا ، قادر مطلق اب کبی قدیم میدر ، یوقسه نیسایه صکره دن کلدیکندن حادثیدر .  
وقتیله « آریوس » نامنده برراب بونی میدان بحث وجداله قویمش . اب ، مقدم ، ابن ، مؤخر در دیه رک ابن الله ک حادث اولدیغنه قائل اولمشیدی .

انجق ابن الله ک حدوشندن تثلیث مقدسک بطلانی لازم کله چکی جهته از نیق جمعیت کثیره رهبانیه سی طرفندن « آریوس » تکفیر وتلعین و جمعیت مزبور برهان و دلیل سر دینه لزوم کور مکسزین قرار آتی بی اعلان ایمشیدر : هرکیم ابن الله ک موجود اولدیغی وهنوز تولد ایتدیکی بر زمان بولندیغنه ، اولدن بری موجود اولموب صکره دن و یا خود عنصر الهیدن بشقه بر عنصر دن خالق ایدلدیکنه ، حادث و متغیر اولدیغنه ذاهب اولورسه مقدس و عمومی نصرایت کلیسایی طرفندن مطرود و ملعوندر .  
- ایشته بو صورتله « آریوس » تکفیر ایدلدی بعدما او کبی کفریاته یعنی تعدیلات و تصحیحاته جرأت ایده جک کیمسه بولندی . « انتهی »

شریعت اسلامیه ایسه فکر تشبیهی بی قطعاً رد ایدرک انک کفر محض اولدیغنه حکم ایلر .

فکر تنزیهی - جناب حق هر درلو تشبیهات و محسوساتدن بری و منزله طوتمقددر . انجق فکر تنزیهی ایله جناب حق معرفت

مکن اوله‌ماز چونکه فکر تنزیهی هیچ برشی اثبات ایده‌میوب  
 بالعکس هر شیئی نفی ایدر ، جناب باری اوله‌ده دکل ، بویله ده  
 دکل دیه‌راک بتون نعوت وجودی سلب ایلر . حتی قوهٔ محاکمه‌لری  
 نقصان اولانزه چوق کرده تنزیه ایله عدمی شیء واحدکی کویسترر.  
 روحانیون مسالکی فکر تنزیهی اوزرینه مؤسدر . فلسفهٔ  
 روحانیون و خرسیان الهیاتنه کوره صانع تعالی برشخص  
 روحانیدر .

اسلامیت ایسه جناب حتی شخصیت ؛ روحانیت کی محدود  
 و متناهی برشیه توصیف ایتمز و بوکی اوصافدن هیچ برشیئی  
 حضرت الله اسناد ایلمز .

فکر توحیدی . - تنزیه ایله تشبیهی نقطهٔ حقیقتده جمع ایدن  
 و باجمله ادیانک سرائر و حقائقنی جامع اولان بر عقیدهٔ اسلامیهدر .  
 کلمهٔ جامعه [ لا اله الا الله ] اله فکر توحیدی تماماً افاده ایدلشددر .

بو حقیقتی ( لیس کمله شیئی و هو السميع العليم ) آیی لاهوتی

ربلاغتله ایضاح اتمکدهدر ، ( لیس کمله شیئی ) تنزیه مطابق  
 افاده ایدر . اکر وصف الهی بو قدرله بر قیله ایدی ادراک بشره  
 خطاب ایدلماش اولوردی . چوکه جناب باری هیچ بر شیئه  
 بکزه مز دیمک ادراک بشرده کی صور موجوده ک هپسنی اطال  
 اولور . و بویله بر توصیف الله برشیء بیلدیرلش صایلمایه جنی کی

بیامک امکافی ده سلب ایدلش بولنور . و او حالده [ وما خلقت  
الجن والانس الا لیعبدون ] ن آخی حاشا معنا سز قالیردی .  
یا لکز [ السميع العليم ] ده شبیه مجرد افاده ایدر اکر جناب خالق  
بلا تنزیه و بو اوصاف ایله تعریف ایدلسیدی آدم پرستی منزله سنه  
دوشولوردی فکر توحیدی ایسه بو ایکی جهتی نقطه حقیقتده  
جمع ایله جلوه نما اولور .

« لا اله الا الله ، کلمه توحیدی یکدیگرینه ضد و حقیقتده ایکیسی  
شیئی واحد اولان ( لا ) و ( الا ) عبارتدر .

بشرک فهم و ادراک ایتدیکی شیلر بو ایکی وحدتن ( لا ) و ( الا ) دن  
خارجه حقیقه ماز چو که یا اقرار و یا انکار ایله بیلنیر بیلنمک ایسه  
بر موجودیتدر شو حالده بتون صور موجودیت شو کلمه طیه ده  
داخلدر . انسانلرک بیک درلو ترا کیب ایله بیک درلو لسان ایله  
بیک شکل و صورتده گاه انکار اقرار مقصیده ذکر و تکرارینه  
محکوم بولندقلری کلمه بودر .

ذات ، صفات ، افعالی

ذات . - برشیئک بتون آثار و صفاتنک مضمر و افعالی  
اولدینی اساسدر . ذات ایله جوهر بیلنمک فرق واردر ، جوهر  
برشیئک خواصی ، ذات ایسه او شیئک ماهیتی در .


ذات برشیدک مجموعه صفات و افعالندن عبارتدر دیرلر . مادیون ایسه ذات ، بروهمدن و بزم تجربه و تدقیقمزدن خارج قالغه محکوم بر موجود معقولدن عبارت اولدیغنی ادعا ایدرلر . طبیعیو- نده بو خصوصده افکار مادیونه میل ایدرک « بز ، ذات و موجود دینلن برشیته تماسدن و اونی ادرا کدن عاجز . بزم فهم و مشاهده ایده بیلدیکمز شیلر الوان ، اصوات ، حرکت کبی امر اضدر » دیرلر .

بوراسی طوغریدر . و بو نقطهده حکمت اسلامیه ایله فن برلشیر . تصوف اسلامییه کوره ذات نامتناهی ، اوصاف نا متناهیسنک عینی یعنی مجموعهیدر .

شو حالده ذات ، اوصافک حقیقت و ماهیتی اولور . لکن ادراک بشر اشیایه نظر ایلدیکی وقت اوصافک بر قسمی زمان و مکانه مفتقر اوله رق کورر یعنی ذاتی کوره من اوصافی کوره بیلور . بر آن غیر منقسمده بر ذاتک بتون اوصافی کور یله بیلسیدی انسان برشیدک ذاتی کور مش اولوردی مادامکه برشیدک بتون اوصافی کوره من شو حالده اوشیدک ذاتی ده کوره من و حقیقتی بیله من ایسته بورایه قدر فن ایله دین متفقددر . لکن حقیقت ذاتی کوره میورز دیه اونی انکاره اقتدار من یوقدر . چونکه بز الوانی کورییورز . فقط رنکی قبول ایدن برشی ، بر ذات

ذات، صفات، افعالی

اولمسیدی نهرنك اولوردی، نهده کوریلوردی اصواتده بیله در .  
صدا چیقاران برشی ، برماهیت اولماسیدی اصواتده اولماز ایدی .  
شو حالده ذات حقك کوریلهمه مسندن وجودینی انکار ایتك  
طوغری اوله ماز .





## استطراد

اسلامدن باشقہ ہانکی ملت اولورسہ اولسون « الله » دینجہ کوزلرینی سمایہ قالدیرر . نیچون ؟ سہادہ نہ واردر ؟ بونک سببی شودرکہ خرافات اولین واسطیرمقدمین زمانلرندن بری بتون ملتار جناب حقہ قرارکاه اولمق اوزرہ کوکلری مناسب بولشاردر . نصرانیت دخی بوبطلان قدیمی ازالہ ایدہ مہ مشدر . حتی حقایق حکمت اسلامیہ تہ تماماً واقف اولہ میان بعض مسلمانلربیلہ . ہم الله یاد اولندی زماں کوزلرینی کوکہ توجیہدن کندیلرینی منع ایدہ میورلر .

جهانده ايلك دفعه اولمق اوزره [ثم استوى الى السماء وهى

دخان] ديان دين اسلام اولدينى ، ومقام معنى الهى به دلالت ايدن سمانك وانده كى عرش وكرسينك معنارى هپ بشقه شيلر اولوب معنای فنیسنجه سما وملكك محل مصابيح واجرام اوا . یعنی کوسترن قرآن عظیم الشان بولندینى حالده بوتوجه اسلام ایچون عیب صایلمازمی ؟

اهل تحقیق اسم الله یادا ولندقدہ اللہینی قلبلری اوزرینه  
قویہرق سرفرو بردہ تسلیمیت اولورلر . بودهاطوغری دکلیدر ؟  
سما وارمنی ؟ یوقی ؟ وارسه اوراده نهلر وار ؟ بودعوالری ،  
بوغوغالری ارباب شك واشتباہه براقه لمده شویله بر موازنه یاپلم :  
اسم الله یاد اولندینی زمان مسلمانلردن بر قسمنك سایه توجه ایتمی  
سمت رأسمزده آثار قدرت الهیهی و ملیونلرله اجرام نورانیہی  
نظر حیرتله کوردکلر یچون اوله بیلور . انحق کره ارضمن نوعیت  
جهتيله سمادن زیاده قدرت الهیهی حاوی اولدینی و خلافتك انواع  
و کثرتی حسبيله ریوزی آثار قدرتک دها زیاده حیرتبخشا  
بر مشنری بولندینی شبهه سزدر .


شو حالده « الله » دینجه نظر مزی اوزاقلره سوق ایتکه  
مجبور اولمیهلم . یقینلر مزده بولنانلرده قدرت بالغه صمدانیہی  
مشمعل بولنمقدہ در . صاحب مشنوی ، مولانا جلال الدین رومی بیوردرلرکه :

گفت پیغمبر که حق فرموده است  
من نکنجمن هیچ در بالا و پست  
در زمین و آسمان و عرش تیز  
من نکنجمن این یقین دان ای عزیز  
در دل مؤمن من نکنجمن ای عجب  
کر مرا جویی در آن دلها طلب

قرآن کریم حق تعالیٰ نیک سہاوتده بولندیغنی ردایتدیکی کبی  
 حکمت اسلامیه ده جناب حتی مکندن منزہ قیلار .  
 حق تعالینک عرش اوزره استواسی ، بر محل تعیننی دیمک  
 دکلدرد . زیرا بویله اولسه جناب حقک مکانه احتیاجی لازم کلیر .  
 کتاب کریمده بر قرارگاه الهی یه اشارت بیوریلور [ ونحن  
 اقرب الیه من جبل الوریڈ ] یعنی بزانشانه شاخ طمارندن دها  
 یقینز دنیلور . البته قلبمزدن عبارت بولنان بیت الله بزم بزلکمزہ  
 شاخ طمرندن دها یقیندر .  
 امدی کندیمزی حقہ ، حتی کندیمزہ اوزاق کورمیوبده  
 حتی کوکلز ایچنده بولورسحق فیوضات الہیہ دن حقیله تفیض ایتمش  
 اولورز . فیض حق عمومیدر ، بتون کائناته ساری وجاریدر .  
 طاشلر ؛ اغاچلر بیلہ بو فیض الہی دن حصہ یاب ایکن ترقیات  
 علمیه ومدنیہ ده بتون اقوامی کچمش اولدقلری ادعاسنده بولنان  
 بعض اوروپا و آمریقالیلرک حالا وجود باری بی اکلایه ماملری  
 بوزوالیلر ایچون نه یمان بر فیض سزلک . نه غریب بر موفقیت سزلکدر ...  
 [ الحمد لله علی دین الاسلام ]
















3 1761 07294405 1

Fehmi, Mehmed  
Hikmet-i hukuk-i  
Islamiye

BP  
165  
F4